

Salmos

Nocon Ifo Diosihuunoa

Fanainsharanifo

Salmo 1

**Diosin tsain tanacoianshu non
unimacointiro**

¹ Yora chacafoan noco shinanmapaiyai
cuscan non tanayamashu non
unimatiro. Ascara yorafo fu
rafufafainyamacahuun. Nanfo
Diosin tsainqui cashu mutsama
icaifo cuscan non ato fu
ayamashu non fasi
unimacointiro.

² Ascan chaca huamisifoan acaifo
cuscan non huatamarocon nocon
Ifo Diosin yonoa cuscan non fasi
fuchipaicoín. Non asca huaiton
shafatisho non yamutishori
Diospan tsainhuunoa non
shinanfafaintiroquin.

³ Nanscarifi ai nan ihui unu chaima
fana cuscaran non itiro. Unu
chaima ihui fanashu ahuun fimi
ichapaya itiro. Ascashu ahuun
puiricai tsasipacunacama.
Nanscarifi ai non nocon Ifo
Diosi tana sharashu non
isharacain non futsafori ato
shara huashotiro. Nantifi non
acai cuscan sharacoin iishquin.

⁴ Ascan nan chaca huamisifocai
ascarafoma. Nanfofin nan
ahuara chaca chispo
cuscarafokin. Fuuquin
chishpofononyatiroafanan
ano chishpofononma.

⁵ Ascacun nan Ifo Diosin yoiatitan
ratofomain a fu ipatirofo
iyamarai omitsiscapanacafo
muran focanicaí nan ahuun
tsain nicacasmafofin Ifo Diosin
ato yoiquin isca huaiquin,
—Man nuno u fu itiromaran,
—ishon ato yoishquin. Nan
chaca huamisifocai Diospan
yorafo fu itiro.

⁶ Nocon Ifo Diosifin yonoa cuscan
huamisifo oinfafainniquin ato
cushusharashquin. Ascan nan
ahuun tsain nicacasmamisifo
omitsiscapanacafo muran
focaniquin.

Salmo 2

**—Min uhuun facuran, —ishon Upa Diosin
ahuun facu yoini**

¹ ¿Ahuuscaimun manifesti Diosqui
fasi sinacaniquin?
Nanscarafofin ipaitsi

ichanancaniquin Diosi chaca
huapaishcaquin.

² Manifoannati aton niaifofo non
niaifo patasharinoafori
ichanancani nocon Ifo Diosi
yafi Furun Cristo potapaicani.

³ Ascashu yoinancaquin isca huacani,
—¿Ahuuscashomun Ifo Diosi
yafi nan catoan non
potatiroquin? Ascan nocofin
nan cadenanun munushumua
cuscara huaquin. Non aton
cadena shatunon afanan non
aton yonomati inonma noco
afanan iquinonfoma, —icashu
yoinannifo.

⁴ Nanfoan nanscara shinanfiaifoan
nan nocon Ifo Diosin nai
murannoashu atoqui shuchia.
Ascashon nocon Ifoan ato
yoiquin isca huai, —iCuu!
Tsoacai ua ahuusca
huatiromaran, —ishon Ifo
Diosin ato yoia.

⁵ Ascaifoan nocon Ifo Diosin ato
nicain samamashta atoqui
sinaquin ato asca huaino fasi
aqui ratucoincani.

⁶ Ascacun Ifo Diosin yoia, —Un
niaifocoin catonni Jerusalén
ano nantifi ato iquinon. Unfin
Jerusalén catoanquin nanno
iishquin. Nan un Jerusalén
machi ano icainofin fasi
sharaquin.

⁷ Ascacun nocon Ifo Diosin noco
yonoa cuscan un mato yoi. Isca
yoini, “Uhuun Ifon Diosin ua
yoia isca huaquin, ‘Minfin
uhuun facuquin. Na
shafatarifin un min upaquin.

⁸ Ascacun ua yocahuun nantifi
manifoti un mia inaincai mina
inon. Nantifi maitio nan yorafo
chai iyacunafori mina iishquin.

⁹ Minfin ato curushcain
iiquishquicain. Ascan nan mai
cuti non potaino samamashta
moshi futsutiro. Nan cuti
moshi futsuacai tsoashtan
afanan ahuuscashon shara
huatiroma. Nanscarifi aquin
nan yoitimamisifo min ato
onaintimanaitiancai tsoashta
ato numatiromaran,” —ishon
Ifoan niaifo catonshon yoini.

¹⁰ Ascan niaifofoan un yoiai cuscan
nicasharacahuun. Amaquiri
shinanantamarocon cayacafi
shinancahuun. Maifoti niaifo
patasharinoafon Ifo Diosi
mato musu huai cuscan
shinancahuun.

¹¹⁻¹² Nocon Ifo Diosi mato musu
huaquin mato amapaiyai
cuscan nicasharariscacahuun.
Ascan ahuunoa man
shinansharayamai man aqui
ratui taritariqui. Diospan
furumun mato yoiai cuscan
acahuun matoqui sinanonma.
Man yoitimaiton oinquin
matoqui samamashta sinaquin.
Man chacahuai cuscan man
shaturiscayamaino man nai
futsushquin.

Asca tsoa Diosi ari caino nanfin
unimacain
cushusharashquiquin.

Salmo 16

**Nocon Ifo Diosi fu non rafupacuaino
shara ipanaca**

¹ Nocon Ifo Diosin, ua
cushusharahuu. Un miqui
oaqui ua mian cushusharanon
un ahuara chaca finononma.

² Unfin uhuun Ifo yoia isca huaquin,
—Minfin uhuun Ifoquin. Min
ua shinansharamayamainocai

- ahuara shara un
shinantiromaran, —ishon un
nocon Ifo Diosi yoini.
- ³ Nan mia icoinra huafoti nan mai
anoafo un fasi ato fuchipaicoi.
Un ato cuscaran ipai. Un
atoqui unimai.
- ⁴ Tsoa dioscoinma fu ipaiyai nanfin
fasi omitsiscai finashquiquin.
Nanfoan aton dioscoinma nan
rami huafo yoina rutushonafo
cuscan uncai ato futan
ashquima. Nan
dioscoinfomahuunoacai un
yoisharashquima. Uncai ato
anufo yoipacunacama.
- ⁵ Ifon, un ashquiai cuscan min ua
catonshona. Mian shara
huashoa. Nantifi uhuuna min
ua cushushomisi.
- ⁶ Min ua amamisi cuscan fasi
sharacoin. Min ua inain cuscan
mian fasi unimamashquin.
- ⁷ Uhuun Ifo Diosin ua
tapimasharamisi. Nanscacun
un mihuunoa yoi sharashquin.
Yamuri uhuun nomuran min
ua cayacafi tapimashquin.
- ⁸ Mun tapian uhuun Ifo ufu ipanaca.
Ufuri rafupacunaca. Uacai
potapacunacama. Ua
cushushara. Ascacuai tsoan ua
ahuusca huatiroma ua
ratupaiquin.
- ⁹⁻¹⁰ Ascacufin uhuun nomuran un fasi
unimacoin. Uhuun Ifoan ua
cushuaino un fasi unimai. Uhuun
Ifon, mincai namisifo muran min
uhuun yoshin potaima. Nan yora
sharacai min ahuun caya mai
murannoa payocomaima. Ascan
uhuun cayari min ua
cushusharashomisi.
- ¹¹ Ahuuscashumain un mi fu
nipasharatiroquin minfin mian

tapimanaquin. Un miqui
nocoaitian mian
unimamacoinshquin. Mian
oinmamisi un niyocun
ahuuscashumain un mi fu
ipasharatiroquin. Un mi fu
rafuaino min uqui fasi
unimashquin. Minhuunnoashu
un fasi unimai mi fu
isharapacunaca.

Salmo 19

**Diosin oni huani cuscan oinquin non
tapitiro naanfin fasi shara
ahuamamishti huatiro**

- ¹ Non nai aria oinquin non tapitiro
fishifo non fari non oshuri
noco tapimai Diosin fasi shara
ahuamamishti huatiro. Nan
oinquin non tapitiro nantofin
nantifi onihua sharaniquin.
- ² Shafatifi yafi yamutifiri nan nai
murannoafoan noco
Dioshuunoa tapimai.
- ³⁻⁶ Nan nai ariafo fari non oshu non
fishifo tsaintiroyamafia
atohuunoashu nantifi manifesti
Dioshuunoa tapitirofo. Nan fari
Diosin nai muran oni huani
nanno ipanon. Fari oaino fasi
punai chashacoin sharaquin.
Shafatifi fari oaino cahuancui
iquicaitiro. Fari cahuancui
funamari afananri cahuancui.
Shafatishon fari cahuancui.
Fari nantishon cahuanscai
maitio coshi finotiro.
Atsanatiroma. Nan
farihuunshon maifoti ahuun
shana mutirofo. Rato maicai
onutiroma ahuun shana
munonma.
- ⁷ Nocon Ifo Diosin ahuun tsain nan
noco yononi cuscan fasi shara.
Noco yononi cuscan

- fustishtacai chacama. Ahuun tsainhuunshon non tapisharatiro noco nantifi cushusharafain oinmasharafain noco unimamaiton. Ahuun tsainmansa noco nimapacuti.
- ⁸ Nocon Ifo Diosin tsain cayacafico. Non tanaiton nocon nomuran unimamasharatiro. Nocon Ifoan noco yononi cuscan shafacafico. Noco tapimanaino non isharatiro funopacushquima.
- ⁹ Non shinain isca huaquin, —Uhuun Ifo Diosin ua yononi cuscan ayamaifin un funo cuana. Ascan uhuun Ifo noiquin un tanasharairan, —ishon nannori shinainfin man isharapacutiroquin chaca huashquima. Nocon Ifo Diosin noco yononi cuscan shara fustisi. Nantifi cayacafico.
- ¹⁰ Oro fasi chicoin non fuchipaitiro. Ascafia nocon Ifoan yononi cuscan fasi shara finacaia. Nan oro fusti osiyama fasi chicoin. Ascafia Diosin tsainmanfin fasi oro finoncoianquin. Nanscarifi ai fona non mutiro fasi fata shara. Ascafia Diospan tsaincaifin fasi fata finoncaiaquin.
- ¹¹ Tsoan Diosin yononi cuscan nicaquin tapitiro ahuara chaca huai fasi musu itiro. Ascan Diosin yononi cuscan nicasharaino noco fasi shara huatiro non funopacunonma.
- ¹² Nocon nomuran non ahuara chaca shinaintocai tsoashtan tapitiroma. Futsafoancai un ahuara chaca hua cuscan tapiama. Ascafia uhuun Ifo Diosin minfin uhuunoa

- tapiaquin. Ascacun un chaca hua cuscan ua rau huapun.
- ¹³ Ifo Diosin, un ahuara chaca huapaiyai cuscan ua amatima huahuu un anonma. Ua cushuhuu nan chacafo un ifo huanonma. Nan fasi chacafo un ifo huayamaino un shara fusti itiro.
- ¹⁴ Uhuun Ifo minfin toquirininhuan cuscaraquin. Tsoancai mia shucatiroma. Ascan un mi fu rafuainocai tsoashtacai ua shucatiroma un mi fu rafunonma. Min ua numa un Upa Dios fu ipanon. Un yoia cuscan huafain uhuun nomuran un shinain cuscan min uqui unimapainon.

Salmo 27

Uhuun Ifoan ua chashapacufoanna shara nanfin uhuun Numamisicoinquin

- ¹ Uhuun Ifo Diosifin uhuun faro cuscaraquin. Uhuun chaca ua soashona un a fu nipanon. Uhuun Ifoanfin ua cushusharaquin un futsafoqui ratutiroma. Uhuun Ifoanfin ua numapacunacaquin. Uncai tsoaquin musutiroma.
- ² Nan yora chacafo ua noicasmamisifoan uqui fucashon ua rutupaishquin. Ua noicasmacaquin ua pacumapaicani. Ascafia nan ua chaca muran pacumapaiyaifofin nanfocaifin chaca muran pacucaniquin.
- ³ Ascan ranushumuafori uqui fucashon ua tarati huayacunafo ua rutupaicani. Un muacai uhuun nomuran un musuima. Un icanoshon ranushumuafoan ua rutupaifiaifoannocai uhuun

- nomuran un muacai un musuima uhuun Ifoan ua cushusharano. Uhuun nomurancai un ratuima.
- ⁴ Un niyoashu uhuun Ifoan pushu muran un ipai a oinpacushquin. Nanfin fasi sharacoinquin. Un shafatifi uhuun Ifo oinpai ahuun pushu muranshon oinquin ahuunoa shinanfafainshquin. Nan fusti un uhuun Ifo yocain ua ashonon.
- ⁵ Un nanno a fu icano un chaca finonfiaiton uhuun Ifoan ua cushushara un ahuuscanonma. Nanno ua onushquin. Nanton ua toquirininhuan camaqui ua nichishquin ahua chaca uqui nocononma.
- ⁶ Un icanoshon ua noicasmamisifoan ua tarati huayacufiashuca uquicai tsoa nocotiro. Un cuya fomancayashon un ato ointiro. Ascan Ifon Diosin pushu murannoa un inafu rutushquin un uhuun Ifo ismashquin. Un unimaquin oi ashcafinin aichoran un huashquin. Ascatare un Ifo fanainshocain aqui unimaquin un manushoshquin.
- ⁷ Uhuun Ifon, un mia cunaiton ua nicapun. Uhuun ramapaipun un mia cufiain cuscan ua cumapun.
- ⁸ Ifon, uhuun nomuranshon min ua tsain yoiat cuscan un nicain, —Uqui ohuun un mi fu tsainon, —ishon mian yoiaiton un mia cuma isca huaquin, —Ifon, un miqui cai mi fu tsainshquin, —ishon un mia cumai.
- ⁹ Ascan uqui onuyamahuu, Ifon. Unfin min oinmatiquin. Uqui sinaquin ua potayamahuu. Minfin mirus fusti ua ashosharamisiquin. Uhuun Diosin, minfin uhuun Numamisi fustiquin. —Un mi fu afanan ipaimaran, —ishon ua yoiyamahuu. Ua potayamapun.
- ¹⁰ Uhuun upa futan uhuun uhua ua potacun uhuun Ifoan ua ihuishquin un a fu inon.
- ¹¹ Uhuun Ifon min amisi cuscan ua tapimahuu. Ua noicasmaifoan ua pacupaiquin ua manacaniquin. Min fain cayacafi ua iyohuun. Un min fain shara ano caiton ua tsoan ahuusca huanonma.
- ¹² Uhuun Ifon, ua cushuhuu ua noicasmaifoan ua tsoan achinonfoma. Nanfoan uhuunoa chani yoiat isca huaquin, —Nanton chaca huaran, —ishon yoiatfocai uncai ahua chaca huama. Uhuunoa fasi tsain curush yoiat ua chaca huashcaquin.
- ¹³ Ua asca huafiatu mun tapian un niyoshon uhuun Ifoan ua asho sharai cuscan un oinshquin.
- ¹⁴ Ascacun nocon Ifo funacaquima manasharacahuun. Ahuun curushhuunoa maton nomuran ratuyamacahuun. Nocon Ifo funaquima mana sharacahuun.

Salmo 32

**David ahuun chaca yoiaiton
Diosin rau hua**

- ¹ Tsoan ahuun chaca yoiaiton nocon Ifo Diosin samamashta rau huatiro. Nocon Ifo Diosin rau huanocai afanan ahuun chacahuunoa shinainma. Ascashu fasi unimacointiro.

² Tsoan nocon Ifon chaca huashon
ahuun chaca yoiaiton
soashotiro. Ascan Diosicain
afanan ahuun chacahuuoa
shinanpacunacama. Nan
ahuara chaca fomantamarocon
ahuun nomuran icon fustisi
shinain. Nanscara yorafin
Diosin unimamaiquin.

³ Ascan un chaca huai cuscan
yoiamai un puusimisima
uhuun chaca fomain nan shaca
fuai mutsai un muupaoni.
Uhuun nomuran un
omitsiscamisi icain shafatisho
un pashapaipaoni.

⁴ Ascatai shafatifi non yamutifiri
min ua onaintimamisi un
chaca hua cuscan un afanan
fomantama yoisharanon. Ascan
non fari muran yonoaiton noco
farin fasi tsacaino non
atsanacointiro. Nanscarifi ai un
ahuara chaca fomaino un fasi
shaca fuai cafiscai.

⁵ Upa Diosin ipaitama un chaca hua
cuscan mun mia yoia. Uncai
afanan mia fomainma. Mun
yoia isca huaquin, —Natian un
chaca hua cuscan uhuun Ifo un
yoiquin, —ishon un yoiaiton
min uhuun chaca ua soashona.
Minfin ua rau huaquin
afanancai uhuun chacahuuoa
min shinainma. Urifi uncai
afanan uhuun chacahuuoa
shinainma. Uhuuncai afanan
chaca nuama.

⁶ Unu faitanhuan nocoriscaino yorafo
machi cuya ano foriscatirofo
unu atoqui nocononma.
Ascashu tsoanshtacai
asatiroma. Nanscarifi ai Ifo
Diosin tanamisifoan chaca
huashu miqui focashon mia

yoiaifoan oinquin min ato
chaca soashotiro. Ascan nan
mia chaca huamisifo min ato
onaintimaitiancai nan mia
tanamisiforica min ato
onaintimaima.

⁷ Uhuun Ifon, un miqui catiro ua
mian cushusharanon ua
noicasmaifoan ua
fuchinonfoma. Ahuara chaca ua
finonfiaiton min ua cushushara
ua tsoan ahuusca huanonma.
Ahuara ahuuscarafiaino min ua
cushua. Ascacun min yorafo fu
non fanaincacainni man
minmain ua numacufin.

⁸ Uhuun Ifo Diosin min ua yoia isca
huaquin, —Min ahuara huai
cuscan un mia tapimai min
icoisharanon. Un min
nomuran yoi rato fainmain
min caicain ahuara chaca
huashquima. Unfin mia
cushuaquin.

⁹ Caballo yafi burro cuscara
iyamahuun. Nanfoancai ahua
cayacafi shinansharatiroma.
Non ato raquiran iyopaiqui
non ahuun cuno anushumuti
fichiqui yafi rusfi tuchishon
non ninifoquin cayacafi shara
non iyotiro. Non asca
huayamainocai non ato
iyopaiyaiquiri catiroma.
Nanscacun burrofo cuscaran
iyamahuun, —ishon nocon Ifo
Diosin ua yoia.

¹⁰ Ascan tsoan Ifo Diosi chaca
huamisishauquin fasi
omitsiscashquiquin. Asca tsoan
nocon Ifo icoindra huatan a fu
icacainaifin atohuun noiquin
unupacunacamaquin.

¹¹ Asca nocon Ifo Diosin yoia cuscan
man huamisifo aqui

unimacahuun. Asca maton
nomuran
shinanchacatamarocon nocon
Ifo Diosin yonoa cuscan
huamisifoan aqui unimai
fanainshofafaincahuun.

Salmo 34

Non nocon Ifo Diosihuunoa yoisharafafainon

¹ Uhuun nomuranshon un Ifo
Dioshuunoa
shinansharafafainquin un
futsafori ahuunoa
yoisharafafaini.

² Un nocon Ifo fustihuunoa
yoisharafafainmisi cuscan un
futsafori ahuunoa yoisharai.
Ascan man ratora futsan maton
nomuran unimayamaquin
nocon Ifoan noco shara
huashomisi cuscan
shinancahuun afanan
unimashcaquin.

³ Non ichananon nocon Ifohuunoa
yoisharashquin. Non yoiquin
isca huanon, —Nocon Ifon
Diosin fustitofin ahuamamishti
huatiroquin. Nan fustitocai
ahuashta chaca huamisima.
Tsoa futsacai a cuscarama. Nan
fusti fasi sharafinacoian,
—ishon non yoinon.

⁴ Ascacun uhuun Ifo un cufian
cuscan ua nicashara. Ua
nicaquin uhuun ratufo ua
potashoshquin. Ascainocai
afanan ahuara chacafoqui un
ratuima. Uhuun Ifon ua numa
un afanan afoqui ratunonma.

⁵ Ascan tsoan Ifo Diosi
cufinfafainnaifin nanfin
ashosharaiquin. Nanfin
unimamaino ahuun fuso
fupishtacoin iiquiquin. Afanan

rafipaitiroma ahuun fuso
fupishtacoin fusti iquin.

⁶ Un fasi omitsiscaquin uhuun Ifo
yopacoinquin un cufian. Un
cufiain cuscan ua nicaquin
uhuun nomuran ua fucash
huamisi cuscan uhuun Ifoan ua
numa un afanan
omitsiscanonma. Ahuara
chacafo uhuun nomurannoa
nantifi uhuun Diosin ua numa.

⁷ Asca tsoan Ifohuunoa
yoisharafafainmisiifin
naanquifin Ifo Diosin ahuun
oinmati nai muran a fu icano
aqui nichishquiquin nan
cushusharanon.

⁸ Nocon Ifo Diosin fasi sharacoinquin
tapicahuun. Tsoan nocon Ifo
icoindra huacun nan
cushusharafain fasi
unimamashquin.

⁹ Man Diospan yorafoquin ahuunoa
yoisharafafaincahuun chaca
huashquinma. Man ascaitofin
man yopai cuscan nantifi mato
inainquin afanancai man ahua
yopashquima.

¹⁰ Asca yora ahuara ichapaya chipo
afanan ahuara ichapa aya
itiroma. Ascashu chipo nanfo
fonaintirofo. Asca tsoan Ifo
Diosi icoindra huaashufin
ahuara sharafocai afanan tsoa
yopapacunacama.

¹¹ Uhuun facufoan uqui fucahuun un
mato tapimanon
ahuuscashumain man Ifoqui
musutiroquin chaca
huashquima.

¹²⁻¹³ Chai nipapaiquin shara fustisi
huafafaincahuun. Ahuara
chaca huayamafain futsafo
chani yoiyamacahuun. A yoia
cuscan acoinpaicaquin.

- ¹⁴ Ahuara chaca potacahuun. Ascatan futsafo sharahuacahuun. Futsafo fu isharapaicain fochishmanantananyamacahuun.
- ¹⁵ Tsoan nocon Ifoan yonoa cuscan huamisifo ato cushusharamisi nan cufiainfo cuscan ato ashoshquin.
- ¹⁶ Ascan nan chaca huamisifo nocon Ifoan ato oincasmal. Ascashon ato cuyoshquin. Rato mai anoshocai tsoanshta atohuunoa afanan shinanshquinma.
- ¹⁷ Ahuun yorafoan cufiainfo cuscan Ifo Diosin nicaquin ato ashoi. Nanfoan ahuara chaca finoainfoan nantifi atohuunoa Ifo Diosin ato numai.
- ¹⁸ Futsan ahuara chaca finoain cuscan ahuun nomuran mui fasi omitsiscail. Ascaino Ifo Diosin ahuun ramapaicoin a fu rafui. Nanscara yorafin Ifon Diosin ato numashquiquin afanan tsoa omitsiscanonma
- ¹⁹ Nan ratora futsan Ifo Diosi yonoa cuscan huamisifofia nantori ahuara chaca ichapa finontiro. Ascafia Ifo Diosifin nantifi chaca finoan cuscan numaiquin.
- ²⁰ Asca nocon Ifoan nan cushusharainocai ahuun shao fusticai tucuima.
- ²¹ Ascan nan chaca huamisifo atoqui ahuara chacacoin nocotiro omitsiscanonfo. Tsoan Diospan yorafo noicasmaiton nocon Ifoan ato onaintimaquin finacoin.
- ²² Ascan tsoa nocon Ifoan ahuun oinmatishon nan yoia cuscan aiton nanfin nocon Ifo Diosin numafain ahuun chaca soashoshquiquin a fu nipanon.

Ascatai tsoan Ifo icoinra huacoinnaiton Ifo Diosin ahuunoacai ahuara chaca yoipacunacama.

Salmo 37

Nocon Ifo Diosi icoinra huacahuun

- ¹⁻² Samamashta farin fasi tsasi huayacufoantiro. Charofori sharamishti foaica nanfori samamashta tsasiacucahuantiro. Nanscarifi ai nan chaca huamisifo niyocanashu ahuara ichapayafiafo nanfori samamashta nai futsushcani. Ascacun nan yoran chaca huahuunoa shinanchacayamacahuun. A chaca huamisifo aya cuscan fuchipaiyamacahuun.
- ³ Ascatamarocon nocon Ifo Diosi icoinra huafain futsafo shara huacahuun. Man ascaiton nocon Ifo Diosin mato cushusharai man isharanon.
- ⁴ Nocon Ifo Diosihuunoa fusti shinain aqui fasi unimacahuun. Man ascaiton maton nomuranshon man fuchipaiyai cuscan nocon Ifo Diosin mato inanshquin.
- ⁵ Nocon Ifo Diosi yoicahuun isca huaquin, —Uhuun Ifon, min ua amapaiyai cuscan ua tapimahuu, —ishon yoicahuun. Nocon Ifo Diosi icoinra huacahuun. Man ascaitofin mato shara huashoshquiquin.
- ⁶ Funamarishta shafaino nantifi oinsharatiro. Nanscarifi ai man Diosi tanashara cuscan nocon Ifo puashquin. Fari masafinin racano fasi chashacoincun shafacaficoin ointirofo. Nanscarifi ai man shara hua

- cuscan Ifon Diosin nantifi
puashquin nantififain oinquin
shara huanonfo.
- ⁷ Nocon Ifo Diosi ahuun ointaifin
puusitama manacahuun.
Funacaquinma. Ascan chaca
huamisifoan ahuara chaca
huaifo cuscan
fuchipaiyamacahuun. Nanfo
oinquin
shinanchacayamacahuun.
Nanfoanfin chaca fustisi
shinancaniquin.
- ⁸⁻⁹ Nan chaca huamisifo samamashta
nai cuyoshquin. Ascan
atohuunoa
shinanchacayamacahuun.
Atohuunoa shinain
sinayamacahuun. Ointi
rochitima iyamacahuu. Futsafo
aya cuscan nanfohuunoa
shinanchacayamacahuun.
Ascan mato nomuran man
shinanchacaquinfin man
samamashta ahuara chaca
huatiroquin. Asca ratoran
futsan nocon Ifo icoinra
huaashu aqui nocoaiton ahuara
shara inainno a fu
isharapacunaca.
- ¹⁰ Nan samamashta chaca
huamisifofin afanan yamai. Ato
funafiaquicai afanan tsoan ato
fuchipacunacama.
- ¹¹ Ascan ratora futsan afiri ahuunoa
shinanmutama futsafokuunoa
shinanqui ato sharahushoain.
Nanscarafofin nocon Ifon
Diosin ato inanpaiyai cuscan
ato inanshquiquin a fu
nipanonfo. Nanfofin fasi
unimaiquin. Nanscarafofin
ahuara chacafoan aton
nomuran ato fucash
huatiromaquin.
- ¹² Ascan nan chaca huamisifoan Diosi
tanamisifokuunoa
shinanchacamisifo
ahuuscashomain non ato chaca
huamatiroquin. Tsoan ahua
chaca huayamafiafo atoqui fasi
sinacani.
- ¹³ Ascafia Ifon Diosin tapian chipo
nan chaca huamisifo
samamashta ato
onaintimashquin.
Nanscarafoquin Diosin atoqui
shuchi.
- ¹⁴ Nan chaca huamisifoan yora
ahuuomafo non ahuamafori
ato nopo futan piafoyashon ato
rutushcani. Ascano nan
isharamisifori ato rutupaicani.
- ¹⁵ Ascafia nanfocai fin afiri aton nopun
rutushquicaniquin. Ascaifoan
futsafoan aton piacatifato
tucumishtipacushquin.
- ¹⁶ Nan nocon Ifo Diosi tanamisifo
fustitofin shara huamisiquin.
Ahuara ichapayamafishu
unimamisi. Nan chaca
huamisifofin ahuara
ichapayaquin afocai
ahuuomafo cuscarama. Afocai
unimacointirofoma.
- ¹⁷ Nan chaca huamisifofin aton
curushu ato samamashta
shatushquiquin. Ascan nocon
Ifoan nan ahuun yora sharafo
cushupacunaca.
- ¹⁸ Nan ahua chaca huamisifoma Ifo
Diosin shafatifi ato cushui. Ato
ashoain cuscacai
unupacunacama.
- ¹⁹ Ahuara chaca finontirofocai Ifo
Diosin ahuun yorafo
cushusharainocai nayoshquima.
Futsafo tushuomafiano nocon
Ifo Diosin ahuun yorafo ato
pimashquin.

20 Ato asca huafiaino nan chaca
 huamisifo nai futsushquicani.
 Nan fasi fununun charo
 sharamishtifo foaifiashu farin
 tsacaino samamashta tsasi
 acucahuatiro. Fuuquin
 samamashta coin yamarisca
 huatatiro. Nanscarifi ai nan
 nocon Ifo noicasmamisifo
 naacani yamariscatashquicani.

21 Yora chaca huamisifoan futsa
 ahuara fiiyanyofiafashocai
 afanan futsa nasomisifoma.
 Ascan nocon Ifoan ahuun yora
 sharafocai ascarafoma.
 Nanfoanfin futsafo ichapa
 inansharamisifoquin.

22 Tsoa nocon Ifo Diosin shara huai
 nanfofin nocon Ifoan
 inanpaiyai cuscan
 fiishquicaniquin. Ascashu a fu
 ipanacafo. Ascan nan ratorafo
 nocon Ifo Diosin ato tsain
 chaca huainofin nai
 futsushquicaniquin.

23 Asca ratora isharamisifin nocon Ifo
 Diosin fasi aqui unimaiquin.
 Ascashon nan
 tapimasharashquin
 ahuuscashumain isharatiroquin.

24 Nocon Ifoan noco mutsoanocai
 otisifiai non pacutiroma.

25 Un pushco iyopaonifiashu natian
 un anifoshtacoin. Ascan uncai
 oinmisima nocon Ifoan ahuun
 yorafo ato potaiton. Uncai aton
 facufo oinmisima futsafo tushu
 yocaifoan.

26 Diospan ahuun yora sharafoan
 ahuara ichapa ato inanfain
 futsafoanri ato ahuara yocaiton
 samamashta inanyotirofo.
 Ascaiton oinquin nocon Ifoan
 aton facufo shara
 huashoshquin.

27 Ascan futsafoan mato chaca
 huamapaiyaino
 atomaquinoashu
 foriscatacahuun chaca
 huashquima. Chaca
 huatamarocon futsafo shara
 huashohuun. Ifo
 Diosihuunoashu man ascaitofin
 ahuun mai ari man a fu
 isharapacunacaquin.

28 Nan futsafo shara huamisifofin
 nocon Ifo Diosin atohuun
 noicoinquin. Nan ato yoia
 cusca huamisifocun ato
 potashquima. Ascashon ato
 cushupacunaca. Ascan chaca
 huamisifocai nocon Ifo Diosin
 aton cushuima. Nanfofin aton
 facufoya cuyoshquicaniquin.

29 Nan Diosin tanaquin shara
 huamisifofin ahuun mai ato
 inainquin a fu ipanonfo.

30 Nan Diosi tanaquin shara
 huamisifoan futsafo yoiquin
 cayacafi shara yoimisi.
 Ascashon ahuara shara
 cayacafi fusti yoicoimnisifo.

31 Tsoan ahuun nomuran nocon Ifo
 Diospan tsain shara
 shinansharamisishaquin ahuun
 fain caicai tsoashta
 funopacunacama.

32 Nan yora chacafoan nocon Ifo
 Diosin tanamisifo cushucashon
 ato rutupaishquicani.

33 Ascafia nocon Ifoan ahuun yorafo
 cushuainocai nan yora
 chacafoan ato chaca
 huapaiyaifo cuscacai
 atirofoma. Aton niaifofo ano
 ato iyofiaifoanno nocon Ifo
 Diosifin ahuun yorafo
 cushuiquin. Ascashocai
 atohuunoa yoitiroma isca
 huaquin, —Manfin chaca

huamisiquin, —ishoncai
yoitiroma.

³⁴ Ascacun funayamacahuun.

Funacaquimarcocon nocon Ifo
Diosin asharaitian
manasharacahuun. Nanton
mato amapaiyai cuscan fusti
huacahuun. Man ascaiton
matohuuinoa yoisharafain
ahuunari mato inain a fu man
ipanon. Ascan nan chaca
huamisifo cuyoaitian man ato
oinshquin.

³⁵ Mun oinmisi nocofunu chacacoin
futsafohuun ramapaimisima.
Ahua futsacai yopatama. Nan
ihui uhuapa mutsispa cuscaran.
Nanscarifi ai niyoashu
curushcoin ipaoni.

³⁶ Ascfiashu samamashta man naani.
Afanan natian yamai. Nan
funafiaquicai tsoan
fuchitiroma.

³⁷ Ascan yora cayacafi shara fusti
imisifohuunoa shinancahuun.
Nanfofin futsafo fu
isharamisiquin. Tsoacai fucash
huamisifoma. Ascashu fasi
isharapacunacafo.

³⁸ Asca chaca huamisifocai
ascarafo. Nocon Ifon Diosin
ato namaquin cuyoshquin.
Nanfo isharatama chipo
omitsiscashcani.

³⁹ Nocon Ifo Diosin ahuun yorafo
numashquin a fu
nipasharanonfo. Ahuara chaca
finonfiacani nocon Ifo Dios ari
fotirofo ato cushusharanon.

⁴⁰ Nocon Ifo Diosin ahuun yorafo
asho sharafain ato numashquin
chaca huamisifoan ato ahuusca
huanonfoma. Nanfofin Diosin
ato cushusharaino a fu
isharapacunacafoquin.

Salmo 40

**Uhuun Ifo, un unimai min ua
amapaiyai cuscan huai**

¹ Un funaquima nocon Ifo mana ua
ashonon. Un cunaiton ua
nicafain ua oian.

² Uhuun nomuran un fasi
omitsiscaquin mua nan
quininhuan micha muran iquia
mutsa un mua. Ascaiton nocon
Ifo Diosin ua nan quini
murannoa tsucaí cafisca
huatan ua toquirininhuan
camaqui niima un afanan
pacunonma.

³ Ascashon nocon Ifo Diosin ua
fanainti funa shara tapimana
uhuun Ifo Dioshuunoashu un
fanainsharanon. Nocon Ifoan
ua shara huashoa cuscan yora
ichapafoan nicacani arifi nocon
Ifo afanan chaca huapaitama
nan icoinra huashcani.

⁴ Tsoan nocon Ifo icoinra huashu fasi
unimashquin. Ascashucaí a
cacapaimisifo fu ipaima. Nan
dioscoinfoma nan rami huafo
cufimisifo furicai ipaima.
Nocon Ifo Diosi fustifin icoinra
huaiquin.

⁵ Uhuun Ifo Diosin, min
ahuamamishti huatiro cuscan
tsoan ascara oinyomisima min
noco ismamisi cuscan huafain
min noco ahuarafó ichapafo
ashoshquiai cuscacai tsoanshta
tanán huatiroma. Nanfohuuinoa
un mato yoipaifiaquicai un
mato fasi chaicoincun yoiquin
nocotiroma.

⁶ Upa Diosin, non inafó rutushon
coatan hua rafanan noco chaca
min soashoni. Ascfiacai ascara
min fuchipaima. Non ahuara

- futsafori non mia
 inanpaifiaton acai min
 fuchipaima. Natian mun tapia
 min noco nicamapai min noco
 yoiyai cuscan non aiton.
- ⁷⁻⁸ Ascan nocon Ifoan yoini isca
 huaquin, —Uhuun Upa Diosin,
 un mia ariashu nuno mai ano
 fotoa min ua amapaiyai cuscan
 huashquin. Uhuun
 nomuranshon min tsain shara
 un nanua. Nannori uhuunoa
 min tsain cununiran, —ishon
 nocon Ifoan yoini.
- ⁹ Nan mia icoinra huafo ichanan
 huashon un min tsain shara ato
 yoiyai. Ifon, man min tapian
 uncai oi nomamisima un
 nantishotapiquin un ato
 yoimisi.
- ¹⁰ Uhuun nomuranshocai urus fusti
 min tsain shara un nanuama.
 Mun ato yoimisi nan min
 yoyomisi cuscan min huaiton.
 Minfin mirus fusti nocon chaca
 soashotiro non mi fu
 ipasharanon. Nan min yora
 ichapafoya ichanaintian un ato
 yoimisi min nocohuun noifain
 min tsain icocoincun.
- ¹¹ Ascan, uhuun Ifon, ua shinanhuun.
 Uhuun ramapaihuu. Min uhuun
 noiquin nan min icon yoimisi
 cuscan ua cushusharapun.
- ¹² Ascan ahudara ichapa chacacoinfo
 uqui noco. Nan chacafocai
 tsoan tanan huatiroma. Un mia
 chaca hua cuscaricai un tanan
 huatiroma. Afohuunoa un
 shinain uhuun nomuran un
 omitsiscai uhuun ointi man
 nishma cuana.
- ¹³ Ascan uhuun Ifon ua shinanhuun.
 Ua fuchipaiquin ua ashorisca
 huahuu. Ifon, Ua numapun.

- ¹⁴ Futsafoan ua rutupaimisifo cuscan
 nanfo rafipainonfo. Nan chaca
 huafo cuscan aton nomuran
 ato shinanmahuu. Ua chaca
 huapaifain ua rutupaicaniquin.
 Ascacun ato onaintimafain ua
 numahuu.
- ¹⁵ Ua noicasmacaquin yoiyai,
 —iAichofain! Natiafin na
 nocofunon omitsiscain,
 —ishon uhuunoa yoiyai.
 Ascafia ato shinanmahuu
 afoancaifin fasi chaca
 huamisishaquin
 rafipaitirofoquin.
- ¹⁶ Ascan mi fu rafumisifo
 minhuunoaashu unimacain aton
 nomuran roama roama
 sharanonfo. Minfin nocon chaca
 soashonaquin non mi fu
 nipanon. Nan tapicoincashonfin
 mia noicoincaniquin. Ascan oi
 ashcafinin isca huaquin
 yoipacupainonfo, —Nocon Ifo
 Diosin, min nantifi finoncoian.
 Tsoa futsacai mia cuscara
 sharamaran, —ishon
 yoipacupainonfo.
- ¹⁷ Uhuun Ifon, uncai ahuaama. Un mia
 fasi yopai. Ua shinanpun. Min
 ua ashosharafain min ua
 numamisi. Upa Diosin ua
 manamaquima. Oriscahuun ua
 numashquin.

Salmo 42

Mun tapia nocon Ifo Diosin fustiton ua ashotiro

- ¹ Chasho nomicoi ashashaitiro
 shushanqui nocoriscapai
 ayashquin. Nanscarifi ai uhuun
 Upa Diosin un fasi mia yopai
 mi fu ipashquin.
- ² Uhuun nomuran un mia fasi
 shinain. Un fasi nomicoi nan

unu yopai cuscari un fasi mia
yopacoin min ua ashoai cuscan
min ua shinanmasharanon.
¿Uhuun Upa Diosin ahuutian
un miqúi catiromun mi fu
iishquin?

³ Shafatisho yafi yamutishon un
uaimisi. Ascan ua
noicasmacaquin ua cashu
mutsama huacaquin yoiafo isca
huaquin, —¿Min Diosi
ranimun? —ishon ua
yoimisifo.

⁴ Non iyopaoni cuscan afohuunoa un
shinain uhuun nomuran un fasi
isincoin. Ipaonifo yora ichapa
Diosi pushu ano un ato
iyopaoni. Caashu nantifi non
unimai. Oi ashcafinin non
fanainpaoni. —iAicho, uhuun
Ifo Diosin! Min noco shara
huamisiran, —icashu non
unimayanan non fanainni.

⁵⁻⁶ ¿Ascan uhuun Ifon ahuuscaimun
natian un unimatama uhuun
nomuran un fasi omitsiscái un
puusicamaquin? Natianfin un
uhuun Diosihuunoa
shinaincain afanan ua
unimamanon. Nanfin uhuun
Numamisi icain uhuun
Diosiquin. Ascan natian un
afanan ahuunoa yoisharai.
Natian uhuun nomuran un
unimaima. Ascafia Diosin ua
sharahuashomisi cuscan un
afanan afohuunoa shinain
unimashquin. Nan unu Jordán
rufoquiri machi Hermón non
machi futsa Misar ano un
cahuacacainai cuscan Upa
Diosin ua
iyosharafoanfainmisi.

⁷ Unuhuan fuchomanhuan
furannaino noco tsoa

ihuiyamaino non asantiro.
Nanscarifi ai un natian
omitsiscaiton mian numataima.
Min ua ahuara chacafo fuma
cuscan nicaquicai un afanan
tunutiroma. Nan afohuunoashu
un asain cafiscái.

⁸ Ascafia shafatifi min ua noicoinquin
ua ismafafaini. Yamutifiri min
ua unimamai un fanainon.
Nantianri un mia cufin min ua
nimasharamisicun.

⁹ Uhuun Diosin, minfin
toquirininhan cuscaran
mutsisipacoinquin tsoancai
mia shucatiroma. Ascan un
mia yocain isca huaquin,
—¿Ahuuscai mian
ointiaquimamun? Ua
noicasmamisisfoan ua
omitsiscamaifoanno uhuun
nomuran un fasi shinancoian.
¿Ahuuscaquin mian
numamamun un afanan
omitsiscanonma?

¹⁰ Ua noicasmacaquin ua cashu
mutsama huaifoanno un mua
nan uhuun ointi chachia mutsa
un mua. Shafatisho ua yocafo
isca huaquin, “¿Min Diosi
ranimun?” —ishon ua cashu
mutsama huamisifo.

¹¹ ¿Ahuuscaimun natian un
unimaimaquin uhuun nomuran
un fasi omitsiscái puusiquima?
Natian un Dioshuunoa shinain
ua afanan unimamanon.
Nanfin uhuun Numamisi icain
uhuun Diosiquin. Ascan un
afanan ahuunoa yoisharai.
Natiancai uhuun nomuran un
unimaima. Ascafia Diosin ua
shara huashomisi cuscan un
shinain afanan ahuunoashu
unimashquin.

Salmo 46**Nocon Ifo no fu ica**

- ¹ Diosin no fu ishon noco
cushushara. Ahuun curushu
noco inain. Ahuara chaca non
finoainnofin nan noco fu
imisiquin noco ashoshquin.
- ²⁻³ Ascacu noncai shinanchacatama
ratuima. Ahuara chaca ifiaino
mai curushcain
nayanaiyaicaino machifo
tsucuinifoantan unuhuan
muran pacu yamarai
unuhuanri fuchomanhuain fasi
achacoin icaino machifori
nayanaiyaifainocai non
ratuima Diosimain noco fu
icun. Nanfohuunoa
shinancahuun.
- ⁴ Ascan unu yamainocai non
nitiroma. Ascan nan ununfin
non isharatiroquin.
Nanscarifiai Jerusalén pushu
rasi ano Diosin icano ahuun
yorafori nannoashu
unimacointirofo.
Diosinhuunoashu isharatirofo.
Nantofin nantifi
finoncoianquin.
- ⁵ Diosin Jerusalén icanoshocai tsoan
ato ahuusca huatiroma. Ahuara
chaca finononma shafaino
Diosin ato cushui.
- ⁶ Asca mani futsafo mucaifoanno
mani futsafori cuyoshquicani.
Diosin curushcain ato yoiaino
maifoti anoafu tsoacai
pusiquima.
- ⁷ Diosin ahuamamishti huafain
ahuun curushhuunshon nantifi
finoncoian. Nanfin noco fu
icaquin. Jacob ahuun Diosin
nocon cushumisi.
Nanfohuunoa shinancahuun.

- ⁸ Diosin acai cuscan oinyopon.
Nantofin mai chacana
huatiroquin afanan ahuafo
ano inonfoma.
- ⁹ Maifoti rutunainfoan Diosin ato
unumatiro afanan
rutunanonfoma. Nantofin aton
piacatifo tucufain ashifori ato
tucumishtipacushquiquin.
Taramutifori cooi futsushquin
afanan ahuun rutunanonfoma.
- ¹⁰ Ascano nocon Ifo Diosin yoiquin
isca huai,
—iPuusiyamacahuun! Unfin
Diosiquin ua tapicahuun.
Nantifi manifeston uhuunoa
yoishquicani unmain
Diosicoincunfin. Unfin nantifi
finoncoianquin, —ishon Diosin
yoini.
- ¹¹ Ascacun afanan shinancahuun.
Diosin ahuamamishti huafain
ahuun curushhuunshon nantifi
finoncoian. Nanfin noco fu
icaquin. Jacob ahuun Diosin
nocon cushumisi.

Salmo 51**Uhuun Ifo Diosin, uhuun ramapaihuu**

- ¹ Uhuun Diosin, minfin noco
noipacunacaquin. Min
nocohuun noiquin
unupacunacama. Ascacun
uhuun ramapaihuu. Min fasi
nocohuun ramapai. Ascan un
mia chaca huamisi cuscan ua
soashohuun.
- ² Un fasi chaca huacoina cuscan
nantifi ua chocafain ua
turuahuu.
- ³ Un chaca hua cuscan mun tapian.
Nanfohuunoa un shinanafaini
uhuun nomuran un omitsiscai.
- ⁴ Un mia fusti chaca huaiton min
oiancai min ua yonoo cuscan un

- huama. Ascaiton min uhuunoa
yoia cuscan nantifishon
tapishquicani icocoincun. Icon
un mia chaca huamisi.
- ⁵ Un facushtashu cain tauntian un
chaca inacahuana. Icon uhuun
uhuan ua nanuano un chaca
tauni.
- ⁶ Uhuun Ifon, non icon fusti yoifain
cayacafi fusti non shinainton
oinquifin nanscarafin min fasi
fuchipaicoinquin. Un icon
yoifain icon shinainton min
uhuun nomuran ua ahua
cayacafi tapimatiro.
- ⁷ Uhuun chaca ua soashohuun un
afanan mia cuscaran sharacoin
inon. Ua nashimai cafisca
huahuu uhuun nomuran un
afanan choshta itama un yoa
furoamua ointsa oshopa
cuscara shara inon.
- ⁸ Uhuun Ifon, min uhuun chaca
soashonano un afanan
unimacointiro. Uhuun
chacahuunshon uhuun
nomuran min ua
omitsiscamamisi. Natian
afanan ua unimamahuu.
- ⁹ Un chaca hua cuscan afanan nan
chacahuunoa shinanyamahuu.
Un mia chaca hua cuscan
nantifi ua soashohuun.
- ¹⁰ Upa Diosin, uhuun nomuran ua
afanan funa shara huashohuun
un afanan ahuashta chaca
shinanonma. Uhuun nomuran
afanan ua funa cuscaran
imahuu mian yoiai cuscan un
ariscanon.
- ¹¹ Mimaquishon ua potayamafain min
Yoshin Shara umaquinoa
nichiyamapun.
- ¹² Nan un mia icoinra huaquin tau
huainifoannaitian un fasi
- unimacoinni. Ua afanan nansca
huaquin unimamahuu. Uhuun
nomuran ua shinanmahuu min
ua yoiai cuscan un anon.
- ¹³ Min ua asca huainofin min tsain
nicacasmafo un
yoisharatiroquin mia
tanasharanonfo. Ascashon aton
chaca shatufain miqui
nasononfo.
- ¹⁴ Uhuun Diosin, un futsa rutumana
cuscan ua rau huahuu. Minfin
uhuun numamisiquin. Min
uhuun chaca ua soashonano
unimacain un futsafo
fanainshonon min shara fustisi
ahua chaca mi fu itiromaran,
ishon un ato tapimanon.
- ¹⁵ Uhuun Ifon, ua shinanmasharahuu
un mihuunoa yoisharanon.
- ¹⁶ Non mia tanaquin shara huatama
non mia ina rutushonaitocain
min fuchipaima. Min ascara
fuchipaiyaiton un mia asho
cuana.
- ¹⁷ Shinanquicain afanan non mia asca
huapaima. A non chaca
huamisifoahuunoa shinain
nocon nomuran non
isincointiro. Ascacun nocon
chaca non shatupaicoín miqui
nasoshquin. Upa Diosin, non
ascaitofin min fasi
fuchipaicoinquin.
- ¹⁸ Ascan min fuchipaiyai cuscan Sión
pushu rasi anoafo ato
cushusharahuu isharanonfo.
Nan Sión ahuun anu futsafin
Jerusalén. Ahuun unu
cuyacoin pushu huanrasi tarati
huayacunafoanno curushu
shara huahuu afanan noco
noicasmaifo iquinonfoma.
- ¹⁹ Min noco yonoa cuscan huaquin
nocon chaca non shatuano min

nocoqui unimashquin.
 Ascashon non mia ina
 mumacoin rutushofain coashon
 toquirifo putsamuinia anoshori
 afanan moi funu un mia
 rutushonaino min nocoqui
 unimashquin.

Salmo 57

—Uhuun Ifo Diosin, ua ashopun,
 —ishon David cufini

- ¹ Uhuun Diosin un miqui oa min ua
 cushunon. Ascacun uhuun
 ramapaihuu, ua shinanpun.
 Natian ahuarafaoan ua
 omitsisca huamapai. Nan
 tacara facumishti ahuan
 putaon muran onutiro ato
 cushuquin. Nanscarifiai un
 miqui oa min ua
 cushusharanon.
- ² Min nantifi finoncoian. Ascan un
 mia cunai mian nicanon. Mian
 amapaiyai cuscan min ua
 huamatiro.
- ³ Min nai muran ishon ua numamisi.
 Ua noicasmacaquin mufaintan
 ua chaca huashcani. Ascafia
 min ua noiquicai uhuunoa min
 ointiaquimamisisima. Min ua
 numamisi.
- ⁴ Nan yora chaca masharo
 cuscarafoan ua chaca
 huapaicani. Masharonun ato
 shutafo cunocoinshon yora
 piquin cuyotiro. Nanscarifi ai
 nan chacafoan ua tarati
 huayacuna ua omitsisca
 huamashcaquin. Uqui tsain
 chaca huacaquin uhuunoa
 yoiiafono uhuun nomuran ua
 isinmapaicani.
- ⁵ Min nantifi nai murannoa
 finoncoian. Nanfoan mihuunoa
 yoiquin isca huapainonfo,

—Min fustifin min nocon
 Ifosharacoinquin, —ishon
 yoipainonfo. Nantifi mai
 anoafaoanri min ahuamamishti
 atiro oinquin nantififain
 mihuunoa yoicaquin isca
 huapainonfo, —Nocon Ifo
 Diosin fustifin fasi sharaquin.
 Nanton ahuamamishti
 huatiroran, —ishon
 yoisharapacupainonfo.

- ⁶ Ua noicasmacaquin ua trampa
 muran pacupai cafisca huacani.
 Ascaquin ua fasi uhuun
 nomuran omitsiscamacani. Fai
 nushmancayan poquimua
 muran un pacua shinantsa
 anon. Ascafiacai un a muran
 pacuamarocon nanfocafin nan
 shoi muran pacui shinantsa
 aafokin.
- ⁷⁻⁸ Uhuun Diosin, uhuun nomuran un
 mia icoinra huacoinna. Ascan
 un unimacoinni mihuunoa
 fanainshoni. Un funanmarishta
 manutifo mihuunshon manui.
 Nansca huai un moitiro.
- ⁹ Uhuun Ifon, un futsafo muranshon
 mihuunoa yoisharai. Un yorafo
 murannoashu mihuunoa un
 fanainquinsharai.
- ¹⁰ Futsafoan noco noitirofia mincaifin
 noco huun noiquin
 finacaiquin. Min noco yoimisi
 cuscan min noco ashomiscocin.
 Mincai noco
 ointiaquimamisisima.
- ¹¹ Min nantifi nai murannoa
 finoncoian. Nanfoan mihuunoa
 yoiquin isca huapainonfo,
 —Min fustifin min nocon Ifo
 sharacoinquin, —ishon
 yoipainonfo. Nantifi mai
 anoafaoanri min ahuamamishti
 atiro oinquin nantififain

mihuunoa yoicaquin isca
 huapainonfo, —Nocon Ifo
 Diosin fustifin fasi sharaquin.
 Nanton ahuamamishti
 huatiroran, —ishon
 yoisharapacupainonfo.

Salmo 62

Diosin fustiton noco cushusharatiro

- ¹ Diosin fustiton uhuun nomuran ua
 shinanmasharatiro ahuara
 chacapan ua
 shinanchacamanonma. Arus
 fusti ua numatiro.
- ² Arus fusti uhuun toquirininhuan
 cuscaran. Diosin u fu rafuaino
 tsoancai ua shucatiroma ua
 pacumashquin. Uafin tarati
 huayacunaquin nan
 noicasmaifo non ahuara chaca
 uqui nocononfoma.
 Ahuarafoancai Diosmaquinoa
 ua potatiroma.
- ³⁻⁴ ¿Ahuutiamun man ua chaca huaquin
 shatuicain? ¿Nantififain man ua
 pacumapaimun? Man manfin
 ua pota cuanaquin un afanan
 niaifo inonma. Un niaifo icano
 ua potapaicani. Unimacain man
 uhuunoa fasi chani yoiäfo.
 Uhuun ointaifi ua shara
 huafiaquin maton nomuran
 uqui shinanchacafiaquin.
- ⁵ Ufiri un yoimua isca huaquin,
 —Diosi fustihuunoa
 shinansharahuu. Arus fusti ua
 shinansharamatiro.
- ⁶ Arus fusti uhuun toquirininhuan
 cuscaran. Diosin u fu rafuaino
 tsoancai ua shucatiroma ua
 pacumashquin. Uafin tarati
 huayacunaquin nan noicasmaifo
 non ahuara chaca uqui
 nocononfoma. Ahuarafoancai
 Diosmaquinoa ua potatiroma.
- ⁷ Diosi fustitofin ua numaquin. Arus
 fusti futsafo shinanmatiro
 uhuunoa shinansharanonfo.
 Arus fusti uhuun
 toquirininhuan curushcoin
 cuscara. Un aqui catiro ua
 cushusharanon ua noicasmafo
 uqui nocononfomaran, —ishon
 ufiri yoimua.
- ⁸ Uhuun yorafoan, nocon Ifo Diosi
 nantishotapiquin icoindra
 huafafaincahuun. Nocon Ifoan
 nocon cushumisi. Ascan maton
 nomuran man shinain cuscan
 nocon Ifon nantifi yoicahuun.
- ⁹ Niaifocoinfo non yora ahuamafo
 nocon Ifo Diosin ato oin
 nanscara rafu. Nan rafu ahuun
 ointaifin ahuama. Balanzanun
 ato tanan huai cafisca huai
 aton ihuucäi ayama.
- ¹⁰ Ato pui fianquin futsafo
 parayamacahuu. Ascashu ahuara
 ichapaya ipaiyamacahuun.
 Futsana onuashu cacapaimisi
 iyamacahuu. Man ahuara
 ichapayafishon isca huaquin
 shinanyamacahuu, —Uhuun
 puihuunoashu un isharatiroran,
 —ishon anori shinanyamacahuu.
- ¹¹⁻¹² Diosin tsain rafu yoia cuscan mun
 nicamisi. Diosin min
 curushhuunshon ahuamamishti
 min huatiro. Nocon Ifon min
 nantifi noicoin. Tsoan mia
 ashosharamisi min ato
 inansharashquin.

Salmo 63

Ifo Diosin nocon ointi muran noco unimamatiro

- ¹ Upa Diosin minfin uhuun
 Diosiquin. Un mi fu
 rafupaicoin. Tsoa nomicoin
 unu yopatiro. Nanscarifi ai

- unfin nan nomiyai cuscaraquin
 uhuun nomuran un mia
 yopacoin. Un mua uhuun
 nomuran un mutocoin.
 Atsanacoin cafiscas mia funai.
- ² Un mia ichananti pushu murannoa
 oin cafisca huamisi. Min
 ahuamamishti huatiro mun
 oian. Nannoshori mun mia
 oinmisi min fasi sharacoin.
- ³ Min ua noiyamainocai un nipaia.
 Un nisharapaifiai min ua
 noicoinquin nan sharafinacaia.
 Ascan mun tapian min
 nocohuun noi. Ascan un
 minhuunoa yoiquin shara huai.
- ⁴ Un niyoshon nantishotapiquin un
 futsafo minhuunoa yoiquin
 shara huai. Uhuun poyan rafu
 un mushan huainifoanshquin
 mia cufinquin.
- ⁵ Yoran tushu sharacapa pii
 mayacointan unimatiro.
 Nanscarifi ai un min tsain
 uhuun nomuran nanuashu un
 fasi unimatiro. Ascan un
 minhuunoa shinansharai
 fanainquin.
- ⁶ Uhuun oshati camaquishon un
 mihuunoa shinanshifafainni.
- ⁷ Min ua shara huamisi. Ascan min
 ua cushuaino un
 minhuunoashu fanainmisi.
- ⁸ Un mi fu rafumisi. Min poyan
 mumihuurinoaton ua cushui
 un pacunonma.
- ⁹ Futsafoan ua rutupaifiacani
 nanfofin chiï uru muran
 focaniquin nanno ipashquin.
- ¹⁰ Futsafoan ashin ato rutuano
 cotocotofoan aton nami picani.
- ¹¹ Ascafia unfin maton niaifoquin un
 Diosihuunoashu unimashquin.
 Tsoan Diosi icoinran huai
 yoitiro isca huaquin, —Nocon

Ifo Diosin fasi sharacoinran,
 —ishon yoishquin. Ascan nan
 chanimisifo ato tsain
 shatumashquin afanan ahua
 yoinonfoma. Ascashu afanan
 pusinonfoma.

Salmo 73

Upa Diosin noco shara huamisi

- ¹ Uhuun caifo Israelifoan aton
 nomuranshon tsoan
 shinanchacayamaiton Upa
 Diosin ato shara huamisi.
- ² Asca un fasi amaquri shinan un
 funo cuana. Nan mahua cuya
 ariashu pacui cafisca un
 aaquin.
- ³ Asca mun oian nan
 curafiapaimisifoan fasi chaca
 huamisisofiashu pui
 ichapayafo. Ahuacai tsoa
 yopaima. Nanscara ato oin
 urifi un ato cuscara ipaipaoni.
- ⁴ Ascashon un oian nanfoancai ahua
 chaca finonmisifoma. Tsoacai
 isinin iyomisima
 mutsisipacoinfo.
- ⁵ Futsafo omitsiscas cuscacai nanfoan
 mumisima.
- ⁶ Yoran tuhuuti sahuua nantifishon
 ointirofo. Nanscarifi ai
 yorafoan nantifiton ointirofo
 nanfo fasi cacapaimisifo.
 Tsoanshtahuunca
 ramapaitirofoma. Futsafo
 omitsiscamafiaquicai
 atohuunoa tsoan shinanfoma.
- ⁷ Asca aton nomuran mutoafo chaca
 huapaiyai cuscan tsoa
 unumisima. Nanfofin
 curafiapaimisifoquin. Chaca
 fustisi shinanfafaicani.
- ⁸ Asca nanfoan futsafohuunoa chaca
 yoimisifo. —Mincai ahua
 tapiama. Tsainyamahuu. Un

- mia yoi*ai* cuscan min ua
 nicayamaiton un mia asca
 huatiro*ra*n, —ishon nan
 cacapaimisifoan tsain
 curushcoi*n* yoimisifo.
- ⁹ Dioshuunoari tsain chaca yoimisifo.
 Manifoti foanfafainc*ani*,
 —Nonfin nantifi
 finoncoianquin, —ishon
 yoimisifo.
- ¹⁰ Ascaifoan futsafoan ato icoinra
 huashon ato nicapaicani. —Na
 yorafoan fasi tapicoianran,
 —ishon atohuun*oa* shinanfo
 nan cacapaimisifohuun*oa*
 nanscara yoi*af*o.
- ¹¹ —Non amisi cuscacai Diosin tapiama.
 Noco oinmaran, —ishon nan
 cacapaimisifoan yoi*af*o.
- ¹² Nan chaca huamisifofin
 nanscarafoquin. Nanfoanc*ai*
 ahua chaca finoncanima. Fasi
 ahua*ra* ichapa fificashon
 ahua*ra* chaca uqui nocomisi.
 Unfin funamaritifin
 omitsiscaicain.
- ¹³ Ascan unracafin ipaitsicoi*n*
 shinansharamisiquin. Unfin
 cayacafin Diosi
 tanasharamisiquin.
- ¹⁴ Shafatishon ahua*ra* chaca uqui
 nocomisi. Unfin funamaritifin
 omitsiscaicain.
- ¹⁵ Upa Diosin, un amaquri shinain
 cuscan un min yorafo
 shinanmanaino un atori
 amaquri shinanma cuana.
- ¹⁶ Ascan un fasi shinanquin isca hua,
 —¿Ahuuscaimun na yora
 chacafo omitsiscatama tsoa ahua
 yopaimaquin? —ishon un
 nannori un shinan. Ascashon un
 fasi tapipaicoi*n*.
- ¹⁷ Upa Diosin, nannori un shinain mi
 fu tsainti pushu muran un
- iquia mia cufishquin. Ascan
 nannoshon un mia cufi*ai*ton
 min ua tapimana nan yora
 chacafo*ma*n ahuun un*ut*ani
 ahuu cuscara iishquicain.
- ¹⁸ Asca min yonoa cuscan nanfo machi
 tunanmanri micha mayocoin
 tusirimu caini pacui cafisc*ai*.
 Nanscarifaiyai nan yora chacafo
 naashu omitsispacunacafo
 muran pacuafo tsoanc*ai* afanan
 ato funitiroma.
- ¹⁹ Ascacun fasi ratucoinca*n*i
 samamashta omitsiscapanacafo
 muran pacuashu afananc*ai*
 anoashu tsoa raqui
 fopana*ca*foma.
- ²⁰ Natian man isharai cuscacai man
 chai ipanacama. Non namaino
 yamariscatatiro. Non moishon
 non oianc*ai* non nama cuscara
 afanan non ointiroma.
 Nanscarifi ai nan chacafo
 isharamisifiashu
 yamariscatatiro. Ascan nan
 Upa Diosin omitsiscamisifo ano
 min ato potaino afanan tsoa
 nipanacama. Tsoashtacai
 afanan ato oinnacama.
- ²¹ Urificai un tapiyopaonima un fasi
 amaquri shinanchacapaoni.
 Nan yora chacafo niyoashu
 isharamisi cuscahuun*oa* un
 shinain uhuun nomuran
 ihuucoin mufain uhuun
 nomuran mocacoin mutsa un
 muuni.
- ²² Ascan nan chaca huamisifohuun*oa*
 ahuun unutaqui un
 shinantaima urifi fasi amaquri
 chaca shinanni. Ascano nocon
 Ifo Diosin min uhuun*oa*
 shinanraca un yoina ahua*ra*
 tapiama cuscan ishon min
 uhuun*oa* shinan.

- ²³ Un anori shinanfiafin unfin min yoraquin. Mincai ua potamisima. Minfin ua mutsoaquin un pacunonma,
- ²⁴ Minfin uhuun nomuran mian tapimanaquin un ishquiai cuscan. Chipo min icano ua iyoshquin un mi fu ipanon.
- ²⁵ Min nai muran icano urifi un miqui nocopai mi fu ipashquin. Uncai tsoa futsa yopaima. Un mia fuchipaiyai cusca uncái ahua futsa nuno mai anoshon un fuchipaima.
- ²⁶ Asca un isininqi uhuun nomuran un mua uncái chai nitiroma. Ascafia Upa Diosin minfin uhuun ointi muran ua mutsismashotiroquin. Ascashu natian min u fu ipanaca.
- ²⁷ Ascashon mia tsoan potashufin omitsiscapashquin. Mia nicacasmaifoan min ato onaintimai omitsiscapanonfo.
- ²⁸ Asca uncái ato cuscarama. Unfin Diosi fu rafupacunacaquin. Nanscarafin fasi sharaquin. Upa Diosifin nantifi iquinanquin. Un aqui caiton ua cushusharai. Unfin nantifi yorafo yoiquin isca huaiquin, —Nocon Ifo Diosifin ahuaara sharafo huafafainiquin, —ishon un ato yoishquin.

Salmo 86

Min fustifin Diosiquin

- ¹ Uhuun Ifo Diosin, uncái ahuaama, un mia fasi yopacoin. Ascan ua nicafain ua cumapun.
- ² Un mia fusti Ifo huai. Ascan ua cushuhuu. Minfin uhuun Diosinquin. Un mia fusti icoinra huai. Ascan ua numapun.

- ³ Shafatishon un mia cufiain cuscan uhuun ramapaihuun.
- ⁴ Uhuun Ifon, uhuun nomuranshon un mia cufin. Ua unimamahuun.
- ⁵ Un mia chacahua cuscan mian rauhua. Min fasi shara. Tsoan mia cufiain min fasi atohuun noiquin.
- ⁶ Uhuun Ifo, un mia cufian cuscan ua nicapun. Uhuun ramapaihuu.
- ⁷ Ahuara chaca finonquin un mia cufin min ua numanon. Un mia cufiaintian min ua cumashquin.
- ⁸ Futsafoan aafin dioscoinma rami huaafo. Nanfocai mia cuscarama. Min ahuaamamishti atiro cuscan nanfoancai atiro.
- ⁹⁻¹⁰ Tsoa futsacai mia cuscarama. Min ahuaamamishti huatiro. Minfin yorafo ashotiro cuscan fasi sharacoin. Mirus fustifin Min Diosiquin. Min nantifi yora manifoti ato oni huani. Ascan nanfo miqui futirofo mia cufinshcaquin. Mihuunoa nantifi yoisharashcaquin.
- ¹¹ Uhuun Ifon, min ua amapaiyai cuscan ua tapimahuu. Min ua tapimapaiyai cuscan ua tapimahuu. Minfin icon yoimisi fustiquin. Nanfin un tanaicai. Ua cayacafi shinanmahuu un ointi rafuya inonma. Mia fustifin un tanasharaiquin.
- ¹² Uhuun nomuran un mia fusti shinainno un unimatiro mihuunoa yoi sharashquin. Un nantifi yorafo mihuunoa yoisharapacunaca afoanrifi mihuunoa shinansharanonfo.
- ¹³ Min ua fasi noicoin. Ascan mirus fusti min ua numa. Ascan yora

chacafo faquish muran foaifo
cuscan un canonma.

- ¹⁴ Uhuun Diosin, nan cacapaimisifoan
ua chaca huapai uqui fuafo.
Nan yorafocai tsoashtahuun
ramapaimisima. Natianfin ua
rutupaicaniquin. Nanfoancai
mihuunoa shinanmisifoma.

- ¹⁵ Ascafia mincai ato cuscarama.
Minfin yorafohuun
ramapaicoiquin. Min ato
shara huamisi. Mincai funa
sinamisima. Nantishotapiquin
nocohuun noicoin. Min yoiain
cuscan huamisi. Mincai noco
potamisima.

- ¹⁶ Uhuun Ifon, natian ua shinanhuun.
Uhuun ramapaipun. Unfin min
oinmatiquin. Min curushu ua
inanhuun.

- ¹⁷ Ua ismahuu min ua shara huashoi
cuscan. Min ua shara huai
cuscan uhuun nomuran min ua
shinanmasharaino nan ua
noicasmaifoan oincaquin
tapitirofo un min facu icaino
ua chaca huafain miarifi chaca
huacani. Rafipaitirofo.

Salmo 91

Nocon Ifoan noco cushumisi

- ¹ Ifo Diosin nantifi finoncoian.
Nanton ahumamishti huatiro.
Ascan ratora futsa a fu
rafuaiteon cushusharai ahuun
nomuran shinanmasharai
ahuara chacafoancai a
ratutiroma.
- ² Un Ifo Diosihuunoa yoi isca huaquin,
—Ifo Diosi uhuun Numamisi.
Ua cushuanocai ahuara chacafo
uqui nocotiroma. Uacai ahuusca
huatiroma. Uhuun Ifo Diosi un
icoindra huairan, —ishon un
yoishquin.

- ³ Futsafoan cunu muran noco
pacumapai cafisca huai.
Ascafia nocon Ifo Diosin nocon
Numamisi non aton cunu
muran pacunonma. Ascan pau
curushcoinin noco namatirofia
nocon Ifoan noco cushuaino
nan pau curushcoinfiashon
noco namaima.

- ⁴ Tacaranun ahuun facufo ahuun
putao nonanmanri cushua
cuscan nocori nocon Ifoan
cushua ahua chaca nocoqui
nocononma. Non afu
rafuashucai non ahuara
chacaquin ratuima. Nococai
raqui potayamafain noco
cushua ahuara chacacai
nocoqui nocotiroma noco
chaca huamashquin.

- ⁵⁻⁶ Ascan Ifo Diosin no fu rafuano
yamu ahuara musucoinin noco
ratumapai. Ascafia noco
ahuaton ratumatiroma.
Shafatari noco
pianpaiyaifoanno nonricai
ratutiroma. Faquish yafi
ahuara chacacoin nan pau
isincoinfoya ahuara futsa
musucoinfoan noco
ratumapaifiai nanfoquiricai
non ratuima. Fari masafinin
racano yorafo pau curushcoin
fuchitirofia nocon Ifo no fu
icaino non ratutiroma.

- ⁷ Ascan man icano mil yora
nayamarai diez mil
nafiatirocun ratuyamacahuun.
Nocon Ifoan noco cushuanocai
ahuara chaca nocoqui
nocotiroma.

- ⁸ Icon ahuara chacacai nocoqui
nocotiroma. Asca nan ahuara
chaca huamisifo nocon Ifoan
ato onaitimaiton non ointiro.

- ⁹⁻¹⁰ Nocon Diosicai tsoan finontiroma.
Nantofin nantifi finoanquin.
Man a fu rafuaino mato
cushusharainocai maton pushu
ano ahuara chaca nocotiroma.
- ¹¹ Nocon Ifo Diosin ahuun oinmatifo
nan a fu nai muran icafo
matoqui nichishquin mato
cushunon. Man raquira futsa
caiton mato cushushquin.
- ¹² Ascan man toquiriqui otisicaini
man pacupaiyaiton nocon Ifo
Diosin mato mutsoinifoantiro
man pacunonma.
- ¹³ Ascatai man masharoqui
nocofiacai mato ahuusca
huatiroma. Rono paupari man
puamafaitocai mato nasaima.
Masharo uhuapari matoqui
nocofiaquicai mato ahuusca
huaima.
- ¹⁴ Nocon Ifo Diosin yoiquin isca
huani, —Nan ua noicoinyainfin
un numatiroquin. Nanton
yoimisi cuscan Diosin uhuun
numamisiran ishon yoimiscun
un numafain un cushushquin.
- ¹⁵ Ua cunaiton un cumashquin.
Ahuara chaca finoaintian un a
fu iishquin. Un numafain un
ahuunoa yoiqinshara
huashquin.
- ¹⁶ Un chai nimapacui isharanon.
Ascatan un numashquin u fu
nipanon, —ishon nocon Ifo
Diosin yoini.

Salmo 100

**Nocon Ifo Diosin fustitofin noco oni
huaniquin. Ascacunfin non ahuunafoquin**

- ¹ Nantifi yora maifotifoan unimaquin
oi ashcafinin Diosihuunoa
yoisharacahuun.
- ² Unimayanan nocon Ifo cufifain
ahuunoa yoisharacahuun. Aquí

fucashon ahuunoa unimaquin
fanainshocahuun.

- ³ Nocon Ifofin Diosi fustiquin.
Ascacun tapicahuun. Nanton
noco onihuani. Ascan nonfin
ahuunnacoinfoquin. Nonfin
ahuun yoraquin. Ascan nonfin
ahuun chashoanfo fasi
funununshon piaifo
cuscaraquin. Ascacun noco
cushua.
- ⁴⁻⁵ Nocon Ifo fasi sharacoin. Nocoahuun
noiquin unupacunacama.
Nocon shunifo niyoashu
ipaonifo cuscan natian nan
niyoafori chipo icaifori ato Ifo
Diosin yoiyoni cuscan noco
ashomisi. Ascacun ahuun
tsainti pushu caincaiti ano iqui
fucahuun. Iquishon aicho Ifon
min ua shara huamisiran ishon
nocon Ifo Diosi yoicahuun.
Nan icano iquicahuun.
Iquishon ahuunoa
yoisharacahuun. Mato shara
hua cuscan aichoran huafain
yoiquin isca huacahuun, —Ifo
Diosin, min fasi sharacoinran,
—ishon yoicahuun.

Salmo 103

Nocon Ifohuunoa yoisharacahuun

- ¹ Uhuun nomuranshon un shinan
isca huaquin, —Nocon Ifo
Diosihuunoa yoisharahuu,
—icashu un yoimua. Uhuun
nomuranshon un yoa nan
nocon Ifo Diosi fusti sharacoin.
Tsoa futsacai a cuscarama.
- ² Uhuun nomuranshon un shinan
isca huaquin, —Nocon Ifo
Diosihuunoa yoisharahuun.
Nanton nantifi ua shara
huashoan cuscan
ointiaquimayamahuun, —ishon

- uhuun nomuranshon un
 shinan.
- ³ Un chaca hua cuscan nantifi Diosin
 ua rau hua afanan afohuunoa
 shinanonma. Un pau futsa
 futsatapafo fuchia cuscan
 nantifi Diosin ua caya huamisi.
- ⁴ Un omitsiscapanacafo muran
 cacuana nanton ua numa. Nan
 u fu ishon ua noitan uhuun
 ramapaimisi.
- ⁵ Nanton ua fasi ahuara ichapa sharafo
 ashomisi. Tutucai cuyacoin
 noyai atsanamisima. Nanscarifi
 aquin nocon Ifo Diosin ua
 afanan pushco cuscaran shara
 ima un atsananonma.
- ⁶ Yora futsafoan chaca huaquin
 omitsiscamatirofo. Ascan
 nocon Ifo Diosicai ascarama.
 Nantofin noco cayacafi
 ashosharamisiquin.
- ⁷ Nocon Ifo Diosin imisi cuscan
 Moisés tapimapaoni. Ascan ato
 asho sharamisi cuscan nan
 Israelifo tapimani.
- ⁸ Nocon Ifo Diosin nocohuun
 ramapaicain noco shara
 huashomisi. Nancai nocoqui
 funa sinaima. Nocohuun noicai
 unupacunacama.
- ⁹ Non chaca huai cuscacai noco
 yoipacunacama. Nocoquicai
 sinapacunacama.
- ¹⁰ Non chaca huai cuscan noco
 onaintimapaiquin noco
 onaintimatiro. Ascafiacai noco
 asca huapaimisima.
- ¹¹ Noncai nai muran cuyacoin non
 finontiro. Nanscarifi aquin
 non Ifo Diosihuunoa
 shinansharai nocohuun noiai
 cusca fasi shara finacaia.
- ¹² Fari oaiquiri chashainacahuatiro.
 Ascatan iquipacutiro.
- Afanancai noconantirofoma.
 Nanscarifi ai nocon chaca noco
 soashonano afanan nocon
 chaca no fu ipanacama.
- ¹³ Apan ahuun facuhuun ramapaiquin
 shinansharatiro cuscan.
 Nanscarifi ai tsoan Ifo
 Dioshuunoa yoisharamisifin
 nocon Ifon Diosiri atohuun
 ramapaiquin.
- ¹⁴ Nan nocon Ifo Diosifin tapiaquin
 noco maihuunoa onihuani
 cuscan. Ascashu nocohuun
 ramapai.
- ¹⁵ Nonfin nan fasi yafi charo
 cuscaraquin. Nanfo
 samamashta tsasitiro.
 Nanscarifi ai norifi non
 samamashta natiro.
- ¹⁶ Fasi yafi charo tsasicun fuo foanquin
 yamarisca huatatiro. Nanscarifi
 ai non nai yamariscatatiro.
- ¹⁷⁻¹⁸ Asca tsoan nocon Ifohuunoa
 shinansharamisifin atohuuncai
 noiquin unupacunacama. Aton
 facufo yafi aton funafori ato
 yoiyoni cuscan huafain ato
 yononi cuscari huaifoan ato
 numashquin nanfo a fu
 nipanonfo.
- ¹⁹ Nocon Ifon Diosin nai muran icaton
 nantifi iquina. Nannoshon
 nantifi nai muran icafo non
 mai ano icafori nantofin aton
 niaifocoinshon ato yonoaquin.
- ²⁰ Manfin Diospan oinmatifoquin man
 a fu nai muran imisi manfin
 mutsisipacoinquin. Mato
 yoimisi cuscan man amisi.
 Maton Ifohuunoa
 yoisharacahuun.
- ²¹ Nan man a fu nai muran icafoti
 manrifi ahuun oinmatifo. Mato
 yoia cuscan man amisi. Marifi
 ahuunoa yoisharacahuun.

- ²² Nantifi nocon Ifo Diosin oni huafoti
ahuunoa yoisharacahuun.
Unrifi un ahuunoa
yoisharaiquin.

Salmo 107

Nocon Ifo Diosin noco noipacunaca

- ¹ Nan Ifo Diosifin sharaquin. Nanton
nocohuun noipacunaca.
Ascacun yoicahuun isca
huaquin, —iAicho, Ifon! Min
noco shara huafafainiran,
—ishon yoicahuun.
- ² ¿Mato noicasmacaquin mato chaca
huaifoan Ifo Diosin mato
numamun? Mato numa cuscari
futsafori yoicahuun.
- ³ Asca yora futsafo aton mai anoashu
mai futsa pashcanain futsunifo.
Ascaifoan nocon Ifo Diosin
afanan nannosi ato ichanan
huani. Nan fari oaiquirinoa ato
ihuufain fari iquaiquirinoa
ihuufain fari oai istafarinoa
ihuufain fari cai istafarinoa
ihuufain nansca huashon atoti
ichanan huani.
- ⁴ Ato ichanan huataima atirifi tsoa
istaipama anoashu
foanfafaicanai funonifo.
Tsoancai pushu rasi fuchinima
ano ishcaquin.
- ⁵ Nanscashi nanfo fonainyanan
nomicani naaquin rashquinifo.
- ⁶ Ascashon nocon Ifo Diosi cunanifo
isca huaquin, —Ifon, man non
omitsiscai naicai. Noco
numapun, —ishon cunanifo.
Ascaiton ato numani afanan
omitsiscanonfoma.
- ⁷ Ascashon cayacafi pushu rasi ano
nocon Ifo Diosin ato iyon
nannoashu isharanonfo.
- ⁸ Man mato numaqui nocon
Ifohuunoa yoiquin isca

huacahuun, —iAicho, Ifon!
Min fasi nocohuun noiquin
unupacunacama. Min noco
sharahuafafainmisiran, —ishon
yoicahuun.

- ⁹ Tsoa nomicoiaiton nocon Ifoan ato
nomi shatuin afanan tsoa
nominonma. Fonaincaifoanri
ato ahura shara inain piicani
mayan sharanonfo.
- ¹⁰⁻¹² Atirififoan nocon Ifon Diosin ato
yoiai cuscan nicacasmacaquin
ahuun tsain potanifo. Ahuun
tsain ahuamaran ishon
shinanpaonifo. Ascashu nan
faquish muran ica shinantsain
aton nomuran tsoan
muusharanifoma. Nan cunopan
munushumuashu cunu
murannoashu omitsiscai
cafisca muunifo. Nan nocon
Ifon Diosin ato curushcai
omitsiscamaino nan pacui
cafiscanifo. Tsoashtacain
afanan funimanima.
- ¹³ Nanscara muucaquin nocon Ifo
Diosi cunanifo isca huaquin,
—Ifon, non fasi omitsiscacain.
Noco shinanfain noco
numapun, —ishon yoiaifoan
Ifo Diosin ato numani. Ato asca
huaino afanancai tsoa
omitsiscanifoma.
- ¹⁴⁻¹⁶ Nan nocon Ifo Diosin ato faquish
murannoa caimana cafisca
huano aton ointi ihuucuin
mufiafo afanan ato ointi ihu
muyamafain nan cunopan
munushumua cuscaran
muyamafain nan cunu
murannoashu omitsiscai
cafiscacai afanan tsoan
munifoma. Nanscara
muuaifoan nocon Ifo Diosin
ato numani. Nan cunu muran

- icafocun nocon Ifo Diosin
cunu caincaiti ahuun anu
bronze arasaqui futsani.
Caincaiti futsa cuno ahuun anu
hierrori arasaqui futsani ato
caimashquin.
- Ascacun nocon Ifohuunoa yoiqui
isca huacahuun, —iAicho, Ifo!
Mincai nocohuun noicoinquin
unupacunacama. Min noco
sharahuafafainmisiran, —ishon
yoicahuun.
- ¹⁷ Futsafoancai nocon Ifo Diosi
shinantama nicacasmashon
afanan cayacafi shinantiroma.
Nanscashi aton
chacahuunoashu
omitsiscapaonifo aton
nicayosmapan.
- ¹⁸ Ascashu afanan imis cuscan piipai
sharatama naaqui rashquinifo.
- ¹⁹ Nanscai omitsiscacaquin nocon Ifo
Diosi cunanifo isca huaquin,
—Nocon Ifo, man non nai
omitsiscaicain. Nocon
numapun, —ishon cunanifo.
Cunaquin asca huaifoan ato
numani afanan
omitsiscanonfoma.
- ²⁰ Nocon Ifo Diosifin ahuun
tsainmansi ato caya huaniquin.
Man naaqui rashquiaifoan ato
numani omitsiscanonfoma.
- ²¹ Asca huatan nocon Ifo Dioshuunoa
yoiqui isca huacahuun,
—iAicho, Ifo! Min nocohuun
fasi noiquin unupacunacama.
Min noco shara
huafafainmisiran, —ishon
yoicahuun.
- ²² Inafo rutucashon nocon Ifo Diosin
mato sharahua cuscari marifin
ismacahuun, —iAicho, Ifo!
Min noco fasi shara
huamisan, —ishon
- yoisharacahuun. Asca huafain
nocon Ifoan mato fasi shara
huashoa cuscan unimayanan
fanaincahuun.
- ²³ Ascان atirifoan unuhuan mai
yamai ano aton shashohuanun
pocufainifo ahuafo
inanmitsai focani ahuun
rafanan pui fiishcaquin.
- ²⁴ Focaquin unuhuan oianfo nocon Ifo
Diosin oni huani cuscan fasi
ununhuan noacoin oinnifo. A
muran ahuafo futsa futsatapafo
sharacapacoinfo Diosin
onihuan cuscan oinnifo.
- ²⁵ Ascaifoanno nocon Ifoan ahuun
tsainmansi fuuhuan huaquin
unu fuchomanhuan huani.
- ²⁶ Ascان unuhuan fuchomanhuaino
shashohuan nonoinacahuatan
naman pacucahuancacaini.
Ascaino shashohuan
murannofo fasi ratucoinifo.
- ²⁷ Ascaino yorafo nan pauin cafiscai
ocurafunoashu
cushcacunfaincani pacu
cuanifo. Tsoancai tapinima
ahuuscashumain
asatirofomaquin.
- ²⁸⁻²⁹ Ascashu omitsiscacaquin nocon Ifo
Diosin cunanifo isca huaquin,
—Ifo, man non asain
futsuca. Nocon numapun,
—ishon oiaishcafinin cunaquin
yoinifo. Asca huaifoan nocon
Ifo Diosin ahuun tsainmansi
fuu nishma huafain
fuchomanhuanfiain afanancai
furo inima nan unuhuan
pusiquima racani.
- ³⁰ Ascان nan shashohuan muranshon
oianfo unuhuan pusiquima
racani cusumun fopaiyaifoan
nocon Ifo Diosin ato iyon. Ascaino fasi unimanifo.

- ³¹ Ascacun Ifohuunoa yoiqui isca
huacahuun, —iAicho, Ifon!
Min fasi nocohuun noiquin
unupacunacama. Min noco
shara huafafainmisiran,
—ishon yoicahuun.
- ³² Yorafoya niaifofo ichanaintian
nocon Ifo Diosihuunoa yoi
sharacahuun isca huaquin,
—Nocon Ifo Diosin fasi
sharacoinran. Tsoancai Diosi
finontiroma. Nantofin
ahuamamishti huatiroquin,
—ishon nocon Ifo Dioshuunoa
yoisharacahuun.
- ³³⁻³⁴ Nan yora chacafo icano nocon Ifo
Diosin unu nutsofain mai
mutocoin huatiro. Pozo
cuscaran mai poquimua
murannoari nutsomatiro mai
muto inon. Fana ahuun fimi
ichapayari Diosin fiananan
huatiro mai saoya osiano
afanan fimi foaisharatiroma,
- ³⁵ Asca huashon nan mai chaca
afanan Diosin fiananan
huaquin shara huatiro unu
afaino afanan mai muto
inonma.
- ³⁶ Nocon Ifo Diosin nan fonaincaifo
iyotiro nanno inonfo. Pushu
rasi huanifo a muran
isharanonfo.
- ³⁷ Nan mai shara ano mau huatan
aton fimifori fanacani.
Ascashon chipo aton yonofo
foaisharacun chituti-rofo.
- ³⁸ Nocon Ifo Diosin ato shara
huafafainni aton facu ichapa
cainon. Nocon Ifo Diosin yonoa
cuscan aton moifori ichapa
cainon.
- ³⁹ Nocon Ifo Diosin ato asca huafiaino
aton niaifofoan ato chaca
huaino yorafo omitsiscail aton

nomuran afanan
shinansharacoinanima.
Ascaifoannori afanan aton
yono ichapama yorafori
ichapama ifafaincani.

- ⁴⁰ Ascan nocon Ifo Diosin yononi
cuscan aton caifo
niaifofohuunoa
shinanchacanifo. —Nocon
niaifofocai ahuamaran, —ishon
yoicani. Ascaino Dioshuunshon
niaifofo tsoa istaipama ano ato
nichini nannoashu
foanfainnonfo.
- ⁴¹ Ascafiafoan nocon Ifo Diosin yora
ahuuomafo omitsiscaifoan ato
numai. Ascashon nan chashoan
facu ichapa caintiro cuscai
nanforifi aton facufo ichapa
caincaniquin.
- ⁴² Nan isharamisifoan oincani fasi
unimaifoan. Ascan nan chaca
huamisisocai tsoa puusiquima.
- ⁴³ Ascan nan ratora shinansharamisiton
un yomisi cuscan maton
nomuran nanusharacahuun
nocon Ifo Diosin nocohuun fasi
noiai cuscan shinancahuun.

Salmo 119

Diosin yononi cuscahuunoa yoisharahuun

- ¹ Nan nocon Ifo Diosin ato yonoa
cuscan huafain tsoan chaca
huamismifin fasi
unimashquicaniquin.
- ² Ascan tsoan nan nocon Ifoan ahuun
tsain yoia cuscan amisifin
ahuun nomuran nocon Ifon
onanpaifain a fu rafucain fasi
unimashquiquin.
- ³ Nanscarafoancai ahua chaca
huamisifoma. Ascacun Ifoan
ato iyopayiaiquiri fotirofo.
- ⁴ Uhuun Ifon, min noco yononi
cuscan non mia nicasharanon.

- ⁵ Un fasi min tsain tanasharapai.
Uncai shinanquin futsa futsa
huapaima. Mia fusti un
tanasharapai.
- ⁶ Un ascara shinaincai un rafipaima.
Min ua yonoa cuscan fusti un
shinain.
- ⁷ Min noco yononi cuscan fasi shara.
Ascacun un nanfo tapishon
uhuun nomuran un
shinansharai minhuunoa
yoiquin shara huashquin.
- ⁸ Min ua yononi cuscan un aicai. Ua
potayamapun.
- ⁹ ¿Ahuuscashomain pushcopan ahuun
nomuran shinansharatiroquin
ahua chaca huashquima? Min
tsain yoia cuscan tanacoianshu
pushco isharatiro.
- ¹⁰ Uhuun Ifon, uhuun nomuranshon
un mia fasi funai mi fu
rafushquin. Ascacun ua
cushupun min tsain un
potanonma.
- ¹¹ Uhuun nomuranshon min tsain
shara un nanua mia chaca
huashquima.
- ¹⁸ Ua cayacafi shinanmasharahuun
min tsain shara un fasi
tapisharanon.
- ⁸⁹ Ifon, min tsainfin ipanacaquin. Nan
nai muran mi fu icafoan
yoimisifo cuscan min tsaincai
fianananpacunacama.
- ⁹⁷ Uhuun Ifon, min tsainfin un fasi
noicoincain. Shafatisho min
tsainhuunoasi un shinanfaini.
- ⁹⁸ Min noco yononi cuscan min ua
yoifafainni un nanscaco
huanon. Ascan nan min
tsainhuunshon un tapia
cuscacai ua noicasmaifoan
tsoan tapiama.
- ¹⁰³ Un mua min tsain fata cuscara
shara. Nan fona fata sharafia
min tsaincaifin fasi fata
sharacoin un muicai.
- ¹⁰⁵ Min tsainfin nan uhuun lampara
cuscaraquin. Nanhuunshon
faquishi muran un oinsharatiro
min fai tanasharashquin.
- ¹³⁰ Ascan futsan min tsain
tapisharashon futsafori tapima
sharatiro ahuuscashumain non
isharatiroquin.
Tapisharamafoanri min tsain
nicacaquin tapisharatirofo.
- ¹³¹ Un fasi min tsain shara
fuchipaicoin. Nan chashoanun
nomicoinquin unu ayapai
ashashaitiro cuscan nanscarifi
ai min ua yonopaiyai cuscan un
fasi nanscara shara un tapipai.
- ¹³² Asca tsoan mia noicoiaifin min
ahuun ramapaicai. Uhuunoari
shinantan uhuun ramapaipun.
- ¹³³ Min tsainman ua iyosharahuu un
mia tanasharanon chaca uhuun
ifo inonma.
- ¹⁶³ Nan chanifofin un noicasmacoin.
Uncai nan chanifohuunoa
nicapaima. Ascan min tsain
fustifin un fasi noicoinquin.
- ¹⁶⁵ Asca tsoan min tsain noiaifin
nantofin ahuun nomuranshon
chacafohuunoa shinainmaquin.
Nanscara yoracai ahua
chacapan ato pacumatiroma.
- ¹⁷⁶ Nan chashoan funotiro cuscan urifi
mun funoa. Uhuun Ifon, ua
funapun un afanan mi fu inon.
Min ua yonoa cuscan un
ointiaquimamaquin.

Salmo 121

Ifon, minfin noco cushumisiquin

- ¹⁻² Un machifo oinquin un shinan isca
huaquin, —¿Na machifoanmun
ua ashotiroquin? —ishon un
shinan. Ma. Ascan na

machifoancai ua ashotiroma.
Nan nocon Ifon Diosi fustitofin
ua ashotiroquin. Nantofin
nantifi onihuaniquin. Machifo
yafi mai anoafoti nantifi nai
murannoafori oni huani.

³ Nocon Ifo Diosin noco cushushara
non oroshcomui cafiscas non
pacunonma. Nanton noco
cushusharai nancas
oshapacunacama.

⁴ Icon nocon Ifo Diosin ahuun yorafo
nan Israelifo cushufafaini.
Nancas atsanayamacain
oshamisima.

⁵ Nocon Ifon Diosifin noco
cushuaquin. Nanfin no fu
niaquin. Noco farin tsacanonna
noco mata huashoshara.

⁶ Ascan nan nocon Ifoan noco
cushuaino noco farin shafatan
ahuusca huanonna. Yamuri
oshun chashashon noco chaca
huanonna.

⁷ Nocon Ifon Diosin noco
cushuainocai nocoqui ahua
chaca nocotiroma. Non
niyocun noco cushusharatiro.

⁸ Ascan non caitori nocon Ifo Diosin
noco cushufain non oaitonri
noco cushui. Natianri noco
cushuquin unupacunacama.

Salmo 124

Diosin ahuun yorafo aton Numamisi

¹⁻³ Ascan man Diosi ahuun yorafoquin
yoiquin isca huacahuun,
—Nocon Ifo Diosin fu non
iyamaino nan noco
noicasmamisifoan nocoqui
sinacaquin noco rutuqui cuyo
cuanafu, —nannori Israelifo
yoiro.

⁴⁻⁵ Faitahuanun pushu paonhuacaino
unu muran pushu pacutiro

afanancai tsoan nan pushu
fuchitiroma. Nansca huaquin
pushufu maoquin futsatiro.
Nanscarifi ai nocon Ifo Diosi
noco fu rafuyamaino noco
noicasmamisifoan sinacaquin
nocon mai anoshon noco
potaquin futsa cuanafo.

⁶ Ascacun nocon Ifo Diosin ato
nitumana nocoqui
nocononfoma. Ascacun non
nocon Ifo yoiquin isca huai,
—Aicho, nocon Ifo Diosin, min
noco numa noco
noicasmaifoan noco ahuusca
huanonfoma, —ishon non
nocon Ifo yoinon.

⁷ Puiya trampa muran iquiashu
caicaintiro cuscan norifi non
samamashta carisca noco
noicasmamisifoan noco
ahuusca huanonna. Nan
trampa cuscaran chacanaino
non ichoa.

⁸ Nan nocon ahua huashomisifin
nocon Ifoquin. Nanton nantifi
nai murannoa non mai
anoafori onihuan.

Salmo 127

**Nocon Ifo Diosin nantifi ahuamamishti
noco huashomisi**

¹ Nocon Ifo Diosin pushu oni
huayamaino pushu yonomisifo
ipaitsi yonotirofo. Nocon Ifo
Diosin pushu rasi
cushuyamaino pushu
cushumisifori ipaitsi
cushutirofo.

² Nocon Ifo Diosin nocohuun noi.
Ascacun iscara
shinanyamacahuun, —Unfin
nan shafaino moi. Ascashu un
yonoi nan faquishiaitian un
unutiro. Un ascara yonoyamaino

un non uhuun ahuin non uhuun
 facufoan ahua piyamai fonin
 natiroan, —ishon anori
 shinanyamacahuun. Nocon
 Ifoan noco noiquin noco
 tunumaquin noco shara huai
 non osha sharanon.

³ Nocon Ifo Diosifin noco facufo
 inanquin noco shara huashquin.

⁴ Nocofunun noicasmacaquin chaca
 huaifoan ahuun piacati futan
 ahuun pian afiri numatiro.
 Nanscarifi ai pushcoaiton
 ahuun apa cushusharatiro
 ahuara chaca finononma.

⁵ Ratora futsa facu ichapaya
 unimatiro. Nan noicasmaifoan
 niaifo yoitiro nan apa chaca
 huaifoan. Asca huafiaifono
 facu pushcofoan nan apa
 ahuara chaca shara huashotiro
 ahua chaca finononma.

Salmo 130

Non nocon Ifo Diosi icoindra huatiro

¹ Uhuun Ifo Diosin, uhuun nomuran
 un fasi omitsiscail. Uhuun
 nomuranshocai un shara
 muima. Ascacun uhuun Ifon un
 mia cufin.

² Uhuun Ifon, un mia cufiain cuscan
 ua nicapun. Ua nicain uhuun
 ramapaihuu.

³ Uhuun Ifon, non mia chaca hua
 cuscan min nantifi nocoqui
 cunuano non funo cuana.
 Mincai noco nica cuanama.

⁴ Ascafia mincai ascarama. Min noco
 rau huai non mia chaca hua
 cusca afanan min shinainma.
 Ascan non mihuunoa
 shinansharacoin. Tsoa futsa
 mia cuscarama. ¡Aicho, Ifon!

⁵ Ifon, un mia manai. Min ua
 amapaiyai cusca min ua

tapimanon. Mun tapian min
 tsain cayacaficoi. Min noco
 yoimisi cusca un icoindra huatiro.

⁶ Pushu rasi cushumisifoan shafa
 manamisifo afanan shafanon.
 Unfin fasi finacaiquin uhuun
 Ifo un manai ua shara
 huashonon.

⁷ Nocon Ifo Diosin nocohuun fasi noi.
 Noco noiai cusca
 unupacunacama. Ascan Diospan
 yora Israelifoan nocon Ifo icoindra
 huacahuun. Nonfin chaca
 huamisiquin. Ascafia nocon Ifoan
 noco numa afanan nocohuunoa
 chaca shinainma. Ascaino non
 Upa Diosi fu ipatiroquin.

⁸ Nan fustifin nocon Numamisiquin.
 Israelifo nan ahuun yorafo ato
 numa aqui chaca huamisi
 cuscan nantifi aton chaca
 soashona afanan ascara
 chacafa shinanonma.

Salmo 131

**Nocon Ifo Diosi icoindra huashon
 cufincahuun**

¹ Uhuun Ifon, uncai cacapaimisima.
 Uhuun nomuranshoncai un
 shinanquin isca huaima,
 —Futsafocai ua cuscara
 sharama. Unfin ato
 finoncoianquin, —ishoncai un
 shinainma. Diosin fustitofin
 nantifi tapicoianquin. Ahuarafo
 nocon Ifo fustiton tapia cuscacai
 afohuunocai un shinainma.

² Ascara shinantamarocon nan facun
 shoma shatuashu ahua fu icashu
 unimatiro. Nanscarifi ai urifi
 uhuun nomuranshon un Ifo
 icoindra huacoinni. Uncai ahua
 chaca shinainma un unimai.
 Nan facushta ahua fu icashu
 unimatiro cuscan urifi Ifo Dios

fu un icaino uhuun nomuran
fucashtama un unimacoinni.

- ³ Israelifoa manfin Diospan ahuun
yorafoquin. Ascan natian Ifon
icoindra huaquin
unupacuyamacahuun.

Salmo 133

**Icoindra huacatan nannorifosi
shinainfoanno fasi shara itiro**

- ¹ Diospan yorafoan nannorisi
shinancani fasi unimasharatirofo.
- ² Nan Israelifohuunshon nocon Ifo
Diosi cufinmisifin Aarónquin.
Nan Aarónfin shuni ahuun inin
sharacoin ahuun mapoqui
ocaino ahuun cushnihuun
afapacutan ahuun sahuuti
cupananqui afapacuni. Nan
shuni ahuun inin sharacoin
aqui ocani nan ismashquin nan
Aarónfin Diosinacoin iniquin.
Nanscarifi ai Diospan Yoshin
Sharahuunoashufin non
Diospan yoraquin. Non Diosi
tanasharashu non
unimatanainquin.
- ³ Nan machi ahuun anu Hermón ano
nifipan muchana huai.
Nannoshori machi futsa ahuun
anu Sión muchana huaquin
shara huai ahuafo muto
inonfoma. Nanscarifi ai Diospan
Yoshin Sharahuunshon ahuun
yorafo noinantanancanashu
aton nomuran mutotirofoma.
Ascaifoa nocon Ifoan ato shara
huashoshquin.

Salmo 139

Diosin nantifi tapicoian

- ¹ Uhuun Ifo Diosin, man min ua
onancoian. Uhuun nomuran un
shinain cuscan man min tapian.
Min uhuunoa nantifi tapicoian.

- ² Un tsaocain nicun man min tapian.
Uhuun shinanpan un
shinantaima man min tapian.

- ³ Un acataima man min uhuunoa
tapian. Min ua tapimatiro
ranishomain un tunuyotiroquin.
Shafatisho yafi yamutishori un
acai cuscan man min tapian.

- ⁴ Un ahua yoiataima man min
tapian ahuamain un yoiacain.

- ⁵ Minfin ua rucu cashoicaicain.
Ascatafin min ucachori caicain.
Ascashofin mian manmaincain
uhuunoa yoisharashquin.

- ⁶ Nan min ahuafo huai cuscacai un
tapitiroma. Ahua sharafo min
onain cuscacai uncai onantiroma.

- ⁷ Uncai raqui onutiroma min Yoshin
Sharapan ua fuchinonma.
Ascataricai uncai raqui
ichotiroma min u fu inonma.

- ⁸ Un nai muran caino minrifi min
nanno ica. Nan yora namisifo
icano un caino mirifi min
nannori ica.

- ⁹⁻¹⁰ Nan fari oaiquirinoashu un chai
cayamarai fari iquipacuaiquiri
un icaino nannoshori min ua
mutsoi ua iyoshquin. Min
curushuhuunshonfin ua mian
mutsoinifoannaquin un
pacunonma.

- ¹¹⁻¹² Un yoiquin isca hua,
—Faquishiaínocai shafa
itiroma. Ascan un faquish
muran onucuraca Diosin ua
fuchitiromaran, —ishon un
shinan. Ascafia min ua ointiro.
Faquish yafi shafa nanscara
rafu min ointiro. Yamu min
chashai ointsa. Faquishiri mina
shafa ointsa.

- ¹³ Uhuun uhuan ahuun shaqui
murannoa min ua nantifi
uhuun cayafoya min oni huani.

- ¹⁴ Ascacun un mia aicho huai mian oni
huaquin shara huani. Tsoan
futsacai min acai cuscan atiroma.
Nanfin mun tapicoianquin.
- ¹⁵ Uhuun uhuan shaqui muran
faquishfiano un yosiaiton min
nantifi oinni.
- ¹⁶ Un caiantaima min ua onanni.
Ascan inonpacoai cuscan
shafatifi un acai cusca min
libro muran min cunuyoni.
- ¹⁷ Upa Diosin, min uhuunoa shinain
cuscan fasi shara. Min
shinanpan min shinanquin
shara huai. Uhuunoacai min
shinanshara cuscan tsoashta
nanfo tanan huatiroma.
- ¹⁸ Urificai un ato tanan huatiroma.
Mainfin ahuun fuomishticai
tsoan tanan huatiroma.
Nanscarifi ai uhuunoa min
shinanpan min shinansharai
cuscacai un tanan huatiroma.
Un moiainori min u fu ica.
- ¹⁹ Upa Diosin min nan yora chacafo
cuyoa shara icuana. iYora
chacafoan man futsafo
rutumisiquin umaquinoashu
fotacahuun!
- ²⁰ Uhuun Ifo Diosin, nan chacafoan
miqui tsain chaca huafo. Nan
mia chaca huamisifoan min
anuhuunoa yoiquin tsain chaca
huamisifo. Mihuunoa ipaitsi
yoiafo.
- ²¹ Ratora futsan mia noicasmai urifi
un ato noicasmatiro. Ratotoran
mia chaca huamisi nanfori un
ato oincasmatiro.
- ²² Mia noicasmaifoan un atohuunoa
shinanchacamisi. Ascacun urifi
un copiquiri ato noicasmamisi.
- ²³ Upa Diosin, uhuun nomuran ua
onanhuun. Un shinanquin
shara huayamaraquimain un

shinanquin chaca huaiquin ua
tapimahuun.

- ²⁴ Ascan un ahuara chaca huacun min
oinquin ua tapimahuu un
afanan ahua chaca huanonma.
Nan min ua amapaiyai cuscan
ua tapimahuu. Uhuun Ifo
Diosin, nan min ua
iyopaiyaiquiri ua iyohuu.

Salmo 145

Nantifain nocon Ifo Dioshuunoa yoisharapainonfo

- ¹ Uhuun Diosin min uhuun
niaifocoin. Minfin uhuun
Ifoquin un mihuunoa yoiquin
shara huapacunaca.
- ² Shafatifi un mihuunoa
yoisharashquin. Un nantifin
yoipacunaca isca huaquin,
—Minfin, nocon Ifoquin. Tsoa
futsacai mia cuscarama. Minfin
fasi sharacoinquin.
- ³ Minfin nantifi finoncoianquin.
Ascan nantifi yorafoan
mihuunoa yoisharatiro. Min
nantifi finoain cuscan tsoa
futsancai tapicointiroma.
- ⁴ Nantifi yorafoan aton funafo
mihuunoa yoisharashquicani.
Yoitirofo min acai cuscan fasi
shara. Yoicaquiri min
ahuamamishti acai cuscan aton
funafo yoishquicani tapinonfo.
- ⁵ Ratoran niaifo isharamisi. Ascan
mincaifin nantifi
finoncoianquin. Ahuara
chacacai mi fu itiroma.
Mincaifin fasi sharacoinquin.
Min chashai cuscan tsoan
futsacai ascara oinyomisima.
Nannori aton funafo nantifi
yoipacunacafo. Urifi uhuun
nomuran min fasi shara huamisi
cuscan un shinanshquin.

- ⁶ Asca nanfoan aton funafo
yoishquicani isca huaquin,
“Nocon Ifo Diosin ahuun
curushhuunshon
ahuamamishti noco
ismamisiran,” ishon ato
yoishquicani. Urifi nan min
amisi cuscan nantifi yoishquin.
“Nocon Ifo Diosin fasi
sharacoin noco ashomisi
cuscan tsoan ascara
oinyomisima cuscaran,” ishon
un ato yoishquin.
- ⁷ Min fasi sharacoin min noco
ashofafainai cuscan nantifi
yorafo yoinonancani.
Minhuunoa shara fusti
shinancani unimacani
fanainfafaincani, —ishon non
yoipacunon.
- ⁸ Nocon Ifo Diosin noco shara
huashomisi. Nocohuun
ramapaicain nocoquicai funa
sinamisima. Fasi nocohuun
noicoin.
- ⁹ Nocon Ifo Diosin nantifi yorafo ato
shara huamisi. Nan fustitofin
ato oni huaniquin. Atohuun
ramapaiquin.
- ¹⁰ Nocon Ifo Diosin, min nantifi
onihuani cuscan mihuunoa yoi
sharashquicani. Min yorafoanri
futsafo mihuunoa
yoisharashquicani.
- ¹¹ Min nantifi iquina cuscan tsoan
futsancai ascara oinyomisima
fasi sharacoin yoifain min
curushhuunari yoishquicani.
- ¹² Ascan minhuunoa nannori
yoiaifoan nantifiton tapitirofo
min ahuamamishti huamisi
cuscan min nantifi iquinan.
Tsoa futsancai ascara
oinyomisima fasi sharacoin.
- ¹³ Nocon Ifo Diosin minfin nantifi
yorafo iquipacuquin
unupacunacama.
Nantishotapiquin min yorafo
min aton Ifo iquicai min
unupacunacama. Min noco
yoiyomisi cuscan nanscara min
huamisi. Nantifi min oni
huafoti min atohuun noicoin.
- ¹⁴ Ratora futsan ahuun nomuran isin
mui nan ahuara ihuun papiashu
cacotio cuscan afanan
tunuyamacai pacutiro. Nocon
Ifo Diosifin nanscarafo afanan
ato funimatiroquin afanan
chaca shinannonfoma.
- ¹⁵ Nantifi yorafoan mihuunoa shinain
nan yopaifo cuscan min ato
inain. Tushu yopaifo cuscar
min ato inain.
- ¹⁶ Nan niyoafoti fuchipaiyaifo cuscan
min ato inanshquin
unimanonfo.
- ¹⁷ Nocon Ifo Diosin nantifi acai
cuscan cayacafi shara. Nantifi
nan oni huani cuscan huaquin
noicoin.
- ¹⁸ Tsoan Diosi iconcain cufiaiton
naanfin a fu ipanacaquin.
- ¹⁹ Ratora futsan nocon Ifohuunoa
yoisharamisicun naanfin
fuchipaiyai cuscan ato
inainquin. Nanfofin ato
nicafain ato numashquiquin.
- ²⁰ Ratora futsan nocon Ifo noicoianfin
nantofin ato cushuiquin. Asca
nan chaca huamisifo nocon Ifo
Diosihuun noiyamafin ato
namaquin cuyoshquiquin.
- ²¹ Ascan unfin nocon Ifohuunoa
yoiquin shara huaiquin. Nantifi
yora manifoti anofo nocon Ifo
Diosihuunoa nantishotapiquin
yoisharapacupainonfo.